


CIKONDO CYÀ

ÈKÈLEEZÌYÀ WA TWATÌLÀ

 Mpindyewu dilòòlò edi tudi. . . Kumpàlà mene kwà twètù kubwela mu cikondo cyà èkèleeziyà cinène eci. . . Ndi—ndi ànu ntèkemena ne Mukalenge wetù ùdi ùpòngolola Nyumà Wendè pambidi pèètù ànu. . . ne ùtùbènesha cyàkàbìdì. Nènku tudi mwà kulenga ànu maalu manène mpindyewu bwalu, mu bwalu bunène bùdì bùlwa, tуди mwa kwikala mwab'ewu lumingu lujimà. Nènku, kaa, makèèlèlè dilòòlò awu tuvwa bapìcile mu cikondo cyà butùmbi's wè!

² Èè, mpindyewu kumpàlà mene kwà twètù kubala Mifùndu, tudikù ànu mwà kushintulula ngiimànyinù wetù—wetù bwà tusunsa tukesè ne kwimanaku bwà mwàkù wà disambila.

³ Taatù wetù wa mu Dyulu wa Ngàsà, tudi tulwa mu Dìna dikùmbane mu byònsò dyà Mukalenge Yesù, bamanyè ne dìngà ditùkù Wèwè neùlwe. Nènku tudi tuteeta bwà kulongolola myoyi yà bantu bwà kwakidila dibuulula dinène edi dyà ne Wèwè udi Mwànà udi ne mwoyi wa Nzambì; kùyì mufwè to, kàdi mwikàle ne mwoyi bwà kashidi ne kashidi; ne mwikàle ne mwoyi mu Èkèleeziyà Webè bu Ntèmu wa Mpenta, wa cikondo cinène pàvwa cikondo cyà cyashima cifwànyine kulwa cyumukila mu Bwikadi bwà Mukalenge. Tudi ne disànkà divule dyà kusànkila bikondo abi mwaba ewu paanyimà pàà bidimu cinunu ne nkàmà citèemà.

⁴ Nènku, Taatù, tudi twinyika mitù yètù ne didipwekesha dyònsò mu kaneemu kàà bantu banène aba munda mwà bikondo ebi, mitootò ayi yi Ùvwa mukwàta mu cyanza Cyèbè, yi Wàkamba ne yivwa: “banjèlò bàà Bikondo byà Èkèleeziyà,” bambi abu. Mùshindù mene wutùdì tuKusàkidila bwà Pólò Munsantu munène, wa ku Efèsò. Mùshindù mene wutùdì tuKusàkidila bwa Irénée, Éyì Mukalenge, Irénée musadidi Webè munène; ne bwà Martin Munsantu; ne dilòòlò edi bwà Colomban Munsantu. Mukalenge, mùshindù mene wutùdì tuKusàkidila bwà bantu aba. munkaci mwà cyena Loomò cifiike, cimpàngaanù bivwà munkaci mwà kubwela mu èkèleeziyà, bààkiimana ne bukitù bwà mukenji wa Mpenta ne dibènesha, bààkula mu myakulu, ne—ne bimanyinu binène ne maalu à kukèma, dyondopa dyà babèèdì, ne dibìisha dyà bafwè.

⁵ Bààbùngì bààbò, Mukalenge, bààkakosolodiibwa tutùpàtutùpà, ne kushipiibwa, ne kufidiibwa bu byàkudyà byà nyama yà ntambwe; maalu manènè kwenzeka. Buloba ebu mbwovesha ne mashi à baakàne. Nènku, Taatù, mashi àbò àdi

èlà mbilà leelù ewu àpiisha èkèleeziyà wa cikisu, ne wa masandi awu. Kàdi Wèwè wàkamba, dínghà ditùkù paWàkapòngolola. . . “Mwanjèlò wàkapòngolwelapù lupànza lwèndè, ne ma—mashi à mufwile diitaba yònsò àkasanganyiibwamù.”

⁶ Mukalenge, tukwacisheku bwà kwikala ne. . .kwikala badilongole bwà kwimana mpindyewu, bwalu cikondo cidi munkaci mwà kujika. Patùdì tumòna nyama wa nsèngu yìbìdì ewu ujuukila mu buloba, kàyì ùjuukila mu mishiki ne misùmbà yà bantu nànsha: “Ne nsèngù bu mwànà wa mùkòòkò, kàdi wàkula bu dragon.” Tudi twitabuuya ne dībà dikaadi pabwipi mpindyewu, Taatù, pàdì èkèleeziyà eyi yìdisanga pàmwè: “Kwenza cimanyinu cyà nyama wa lwonji”; ne nebiikale byà njiwù pa musùmbà awu, Mukalenge, wàbènga kudiswikakù awu. Cinyangu cìkolè aci necilwe, kàdi mu dībà adi Wèwè ngwàkalaya bwà kwangata Èkèleeziyà Webè. Tùkwacishèku, Mukalenge.

⁷ Kumpàla kwà dimata dìmwèpelè dyà mâyì kumatadi, Noà ùkaavwa mu bwàtù. Kumpàla kwà kapyà kulengakù Sodoma, Lotà ùkaavwa muyè. Taatù, tudi twitabuuya ne, kumpàla kwà makolè à tupwishipwishi kutaayishawù buloba ebu tupesetupese, Èkèleeziyà neikale mumanè kuya. Tudi ne disànkà dyàbùngi, Mukalenge. Nènku, tudi bamanyè ne bombe mmilembeleja mu bitanda, dilòòlò edi.

⁸ Nènku tudi mwà kutàngila ku Dyulu ne kumòna Mwànà wa muntu ùlandapuka pa Nkwasa Wendè wa butùmbi bwà kwasa lwendu mutàngile pa buloba bwà Dyambwibwa dyà Èkèleeziyà Wendè, ne bamanyè nè makàsà Èndè à musinga mukolè awu kaadyàkulengaku buloba bwà mpèkaatù ebu mu dībà adi nànsha; bwalu ànu mwàkendela Rebekah pa kaameelù ne kutùluka pa kaameelù amu, ànu pankaci pàa nzùbu wa Abraham, mu budimi amu yèyè kutuutakeena ne mukàjì-musèla wendè. Éyì Nzambi, ne Èkèleeziyà neàtwilanganè ne Mukàjì-musèla wetù mu mpeepèlè, “Bwalu twètù bàdì ne mwoyi ne bashààle katwàkupangisha anyi kucyàmakana aba bàdì balààle to. Mpungi wa Nzambi neàdilè, bafwè mu Kilistò nebàjuukè dyàmbedi, nènku netwàngaciibwe muulu pàmwè naabò bwà katuutakeena ne Mukalenge (mu budimi) mu mpeepèlè, nènku netwikale Nendè bwà kashidi.”

⁹ Kaa, tùkwacishèku, dilòòlò edi, Mukalenge. Tupèèsheku kalolò kàa nyama yètù, ne umùsha bululu bwònsò ne dibenga dicyùka dyà maalu mu twètù, nènku swàkù bwà twikale *batámbe* kwenguludiibwa mu Nyumà Mwîmpè. Enzanku bwà Mwanjèlò wa Nzambi àlomboleku dilòòlò edi.

¹⁰ Mukalenge, ncyèna mumanyè cyà kwambila bantu aba to. Mpindyewu, ndi ne maalu-malonda ne bintu bifùnda mwab’ewu pa maalu aWàkenza, kàdi bwalu mbulààle kùdì Wèwè bwà

kumvwija cikondo cìcilwalwa, pa nàнку ndi ndomba bwà Wèwè kucyènza ku Dìnà dyà Yesù Kilistò. Amen.

¹¹ Mpindyewu túbuululààyaaku mpindyewu ku Mukàndà wà Bwàkabuulwibwà. Nènku dilòòlò edi tudi ku cikondo cyà èkèleeziyà cyà. . . Cikondo ciinàayi cyà èkèleeziyà, Twatìlà, cikondo cinène cyà èkèleeziyà cimanya ne nCikondo cyà Mìdimà. Cikondo cyà èkèleeziyà eci ncibânge mu cidimu cyà 606 ne pashiishe cijikè mu cidimu cyà 1520. Ndi. . . Ki cyònsò címvwà mwà kwenza aci, kucyambula. Bamanyi bàà mabala bààbûngì bàtu bàngata—bàngata Munsantu Patrick bu mùtootò anyi kùdi. . . yònsò. . .

¹² *Mitootò mwandamutekète* yìvwa “banjèlò mwandamutekète” bàà Bikondo Mwandamutekète byà Èkèleeziyà. Tudi bamanyè mààlabà dilòòlò, kakùyì mpatà nànsha mikesè to, Luther; ne pashiishe Wesley. Katwèna bamanyè ne mùtootò wà èkèleeziyà wa Laòdikiyà ewu neikalè nganyi to. Cìdi. . . Tudi mu cikondo aci mpindyewu, kubangila ànu ku cidimu cyà 1906 ku mbangilu wa Mpenta. Kàdi nekwikale mwanjèlò wàjuuka wíkala mwà kuumusha mèyì maswika wònsò, kulongolola Èkèleeziyà bwà kuya Kumbèlù. Mpindyewu, mulongeshi kampànda wa—wa. . . mu Nyumà, wíkala mwà kujuuka ne bimanyinu ne maalu à kukèma. Mpindyewu, ndi ndòmba bwà Nzambì wàtùkwàcìshakù bwà kumanya cyòci eci.

¹³ Mu disungula dyà eci, mu dikenketa, Patrick Munsantu ùvwa muntu munène. Nènku mu dyangata dyà maalu mafùnda kale à kale, Patrick Munsantu kàvwa mwena Kàtòlikè nànsha. Wàkatontonona èkèleeziyà wa Kàtòlikè. Nènku mu cikondo cyà Dilongolola, dīyì diswika dyàkadibo naadi adi dyàkakenkeciibwa, ne kujaadika ne Patrick Munsantu wàkatontolola èkèleeziyà wa Kàtòlikè. Aci. . . Patrick Munsantu uvwa mutàmbe kwikala bu muntu wa bulongolodi, ùvwa ne cilongelu cyèndè yèyè mwinè. Ùvwa dyàmbedi. . . pààkakwàciibwaye ku lusenga lwà ku mwelelu wà mbù, yèyè, ne baakùnyi bèndè bàà bakàji bàbìdi bàtuye kàyi mumvweku kàbìdi bwalu bwàbò. Bààkangaciibwa, pàmwàpa ku Loomò ne basùmbisha bwà kwikalabo bapika. Yèyè pèndè wàkangaciibwa ne kupàanyiibwa bu mupika ne kumupàbo mudimu wà kudiisha ngulube.

¹⁴ Wàkiibidija mbwa bwà kucyùnga—kucyùnga nguluba yèndè ayi, ne bikwàbò, nènku yìvwa mwà kubìndulukà ku dikungula dishiilàngane ne bikwàbò bìvwaye mwibìdije naabì mbwa ayi. Nènku ndekeelu wa byònsò aci’s ki kumupèèsha mùshindù wà dibàfuka, musokomene mwinshì mwà bwàtù kampànda, pàvwa mbwa ayi mimubwikìdije yèyè yònsò, too ne mwàkapàtukaye mu mbù. Ku shòò kwalukilaye kwàbù kumulela, mu Irelande, ne kusangana ne mamwèndè ne tatwèndè bàcìvwa ne mwoyi.

Nènku Patrick Munsantu ùvwa m—mwànà wa mwanààbò ne Martin Munsantu munène awu.

¹⁵ Mwinè awu, ùvwa umwe wa ku bantu batàmbe bunène batùdiku bapetè pa kutàngila balùme bàà kacya ku Yesù Kilistò, Martin Munsantu awu's. Èkèleeziyà yèndè yívwa yònsò myùle tètè ne Nyumà Mwîmpè, bwònsò bàvwa bààkula mu myakulu, bàvwa ne bimanyinu ne maalu à kukèma, ne bishima, bishimà ànu byà mishindù yònsò munkaci mwà kwenzeka. Wàkashààla mulame diitabuujà dyà Mpenta munkaci mwà cikondo cyà èkèleeziyà aci cyàkasèlangana ne bwena Kàtòlikè, cimpàngaanù ne beena Nikàlàwù badiswike pàmwè, benza bulongolodi, ne kwenza beena—beena Nikàlàwù, ne tudi tubàbiikila ne *nikao*, mbwena kwamba ne “kukwàta ku bukòòkeshi, kukòòkeshà, anyi kumwènena,” beena kwitabuujà, ne kupàtula Nyumà Mwîmpè mu disangisha, ne “ànu mwakwidi ke wa cijila, ànu muntu awu.” Nwamònu anyi? Ne pashìishe bàdi bàdìtwàla mu mùshindù kanà wònsò ùdìbo baswè awu, ngèèla meeji, nènku pàdìbi ànu ne udi ucitondela nsaserdòsè. Pashìishe bàdi . . .

¹⁶ Tuvwa basangàne makèèlèlè dilòòlò, ne—ne bààkabàtèèka, ne Constantin ngwakatèèka mwèpiskòpò wa kumpàla, ne bàcìtèèka . . . kubàpèèsha nzùbu eyi, mutùdi tunùpèèsha matùkù à ngondo ne bintu byònsò binùdi nufùnda abi. Nènku dìbà adi bàvwa ne difestò dinène dyà solstice kuntwaku, divwà dyenzeka mu dyà matùkù 21 dyà ngondo wa ciswà-munène, ditùkù ditàmbe kwipidika dyà mu cidimu. Ne kubwejamù dipambuka edi, diikale, dyà ne Yéyè ùvwa “ditùkù dyà dìbà.” Nwamònu's, ditùkù dyà—dyà dilediibwa dyà dìbà, bààkuumusha dilediibwa dyà Yesù Kilistò mu ngondo wa cisanga kuya naadi ku ngondo wa ciswà-munène mu dyà matùkù 25.

¹⁷ Ngondo wa ciswà-munène dyà matùkù 25. Munda mwà matùkù àtaanu awu ke mùvwa beena Loomò benza bibilù byàbò binène byà cyanga, manayì à dicyònkomojangana naawu, ne bikwàbò, ne apu mpàvwabo bènza difestò dinène dyà cimpàngaanù edi. Nènku bàvwa batèèka muntu ewu bu nzambì mene kuulu aku, ne bamulwàcika ne bikwàbò byònsò. Nènku bàvwa ne nzambì wabò awu ànu dìbà dyònsò. Nènku kùdi . . . ke dìbà dyàkapatuka beena ne dyambwibwa dìdi paanyimà pàa bukálenge bwà bidimu cinunu abu, ànu mwaba awu, bwalu bàvwa bèèla meeji ne èkèleeziyà ùkaavwa mu Bukálenge bwà bidimu cinunu mwaba awu mene. Nwamònu's, bwalu bàvwa babanji, kabàyì dijinga ne cintu to, bukálenge ne èkèleeziyà byònsò bidisange pàmwè. “Bukálenge bwà bidimu cinunu bùkaadiku,” cìcidi ànu dilongesha dyà Kàtòlikè too ne ku leelù ewu. Nwamònu anyi? Mpindyewu ne: “Bukálenge bwà bidimu cinunu bùkaadikù,” bwalu tudi bamanyè ne aci ncyà mafi. Bukálenge bwà bidimu cinunu: Dilwa Diibìdi dyà Kilistò ke dìdi ditwàla Bukálenge bwà bidimu cinunu. Ncyà bushùwà.

Buloba bùdi munkaci mwà kutwà mikèmu,

kudila bwà ditùkù dyà disùùludiibwa dyà
kalolo adi,
Pààlukilà Mukalenge wetù pa buloba
cyàkàbìdì.

¹⁸ Mpindyewu, munsantu munène ewu ùvwa Colomban. Ùvwa muntu munène wa Nzambì.

¹⁹ Mpindyewu, ndi ne maalu-malonda èndè mafùndaku kaaba aka. Dyàmbedi, cikondo ciinàayi cyà èkèleeziyà, *Twatilà*, cidi cyumvwija ne kwikala “balekela ne kalèngù, badilekelele,” anyi, “cyà mifitù.” Nwamònu anyi? Cìvwa ànu cikondo cyà cikooyike kuumukila ku cidimu cyà 606 too ne ku 1500.

²⁰ Mùtootò ùvwa Colomban, wa mu Ireland ne mu Ecosse, uvwa mwikale mwànà wa mwanààbù ne Martin Munsantu; ne wàkashààla ne mwoyi bidimu bitwè ku makumi àsambòmbò paanyimà pàà Patrick Munsantu, nènku ke mudimu wèndè wa bwambì kubangawù bu ku bidimu makumi àsambòmbò paanyimà pàà Patrick Munsantu. Wendè . . .

²¹ Kacya Yèyè kààkiitabuujuaku dilongesha dyà cyena Loomò to. Ùvwa muntu munène wa diitabuuja. Wàkabenga ndongèshèlù wa cyena Loomò; katukù muyè ku Loomò to, ne wàkabibènga byònsò. Ùdi, ncyènakù mwà kumòna mwaba nànsha ùmwè ùdìbo bamuvwije munsantu to. Bu mwàkenzabo Munsantu Martin ne bakwàbò, kabààkamuvwija munsantu to yèyè ne Irénée bwalu bàcìvwa ànu mu Èkèleeziyà uvwa ne bimanyinu ne maalu à kukèma à Mpenta awu, nènku biitàbùjè. Yèyè kààkangata dilongesha dyà cyena Loomò adi to, pa malongesha àbò awu. Wàkangata Bible bu dilongesha mwàkamulongesha mamwèndè wa difwànà dyà Nzambì, yàyèndè wa Martin Munsantu, kàdi kààkangataku malongesha à cyena Loomò musangu nànsha ùmwè to. Wàkalongesha ne bimanyinu byà Maakò 16 bìvwa ne cyà kulonda mwena kwitabuuja yònsò. Amen! Mèmè. . . Ki muntu wa mùshindù awu wùntù mèmè munangè; wìtabuuja. Èyowà's, mukalenge.

²² Yèyè—yèyè wàkumvwa Dìyì dyà Nzambì dijìkùke dibìikila. Ki cimanyinu cikwàbò cìmpè bwèndè ncyòci aci, nwamònu'ka. Pashiishe cintu nànsha cìmwè kacìvwakù mwà kumwimanyika paanyimà pàà cyòci aci to, ùkaavwa muyè, uh-hum, uh-huh, ùvwa mu njila pààkumvwàye Dìyì dyà Nzambì dijìkùke apu.

²³ Cishima cìmwè. . . Ndi ne bivule bifùn. . . mwab'ewu, kàdi bu twètù mwà kwangataku ànu cìmwè eci. Cishima cìmwè ncyà ne pààkayaye ku cimenga kampànda kùvwà Mukalenge mumutùme, ne cimenga kaciyì ciswè kumwakidila, ke kupàtukabò mwaba awu ne kuteetabo bwà. . . kwangatabò bimbi bàà m̀jiki, ne bikwàbò, ne kukangabo biibi ne kuteetabò bwà kumujibakaja ne dimba dyà misambu, ne bimbi bàà m̀jiki abu. Nènku kubangayè kuyiisha, diyiisha dyèndè kujibakajadi tungimbà atu ne biibi kunzulukabi, kutùngunukayè, ne kuyiisha

nànsha byà munyi. Kufikishayè musumbà mujimà awu ku dikùdimuna dyà mucimà.

²⁴ Cikwàbò cyà cikesè cîndi muswèku kwambakù ncyòci eci. Wàkabwela mu cimenga kampànda. Bimenga byàbò bivwa byela mu bimanu mu miinè matùkù awu, mu bushùwà bwà bwalu. Ki kuyayè ku cimenga, ne kumwipatabò. Ùkaavwa ùmuka ùya, ke mwànà wa balùme wa mfùmù kupetaye disaama dikolè dyà cimpicimpi, ke kutùmabo bantu bwa kulondabo munsantu mwímpè ewu. Kwalukilaye ne kudyàdija pa mwànà wa balùme uvwa upùnga ne lufù awu, ne kwalukilaye ku mwoyi.

²⁵ Èkèleeziyà wendè ùvwa mùjùbwe ntèntè ne Nyumà Mwímpè, kàvwa mufwànyine kwikala ne cingà cintu cishààdile to, bwalu cidimba cyònsò cyà èkèleeziyà wendè cívwa ne cyà kwikala cyujùbwe tèntè ne Nyumà Mwímpè. Nènku wàkatontonona ne kukina bikolè menemene balombodi bàà myànzu bàà ku Loomò. Ndi ngèela meeji ne yèyè ke uvwa mùtootò wà cikondo aci. Cívwayè munkaci mwà kwenza ncinyi? Ne dyakula dyà mu myakulu, dibàtiiza mu Dîna dyà Mukalenge Yesù, ulubuluja bintu mene byàkabangàbo abi. Piikalàbi ne Nzambi kèena mikalu to, ne mùshindù awu ke wàkatèèkaYe Èkèleeziyà Wendè ku cibangidilu, bikèngela bishaalè ànu mùshindù ùmwèumwè awu, ne bìdi ne cyà kwikala nàнку (nànsha mene mu banyaàbanya amu) njila mujimà awu; ùvwa mupàtàkàjùbwe mwambe kujimina *mwab'ewu*, kwalukidila cyàkàbìdi mu Luther.

²⁶ Mpindyewu, tudi baswè kubanga mpindyewu, ne kumòna ní tudikù mwà kubanga kupeta yimwè yà ku mvensà eyi mpindyewu, ku . . .netùbangilè ku mvensà wa 18:

. . .*fundilà mwanjèlò wa èkèleeziyà wa Twatilà*; . . .

²⁷ Nukààvwaku batàbàlèèle diditèèja edi—edi anyi? Mikenji eyi mbàyàmbila mwanjèlò, anyi mwambi udi mwambùle Bukènkè bwà cikondo cyà èkèleeziyà aci. Nwamònu anyi? Mpindyewu, dilòlò dishààle tuvwa bajandùle ne, mu dijikija dyà cikondo cikwàbò cyà èkèleeziyà eci cyà—cyà Peegàmò, ne mwanjèlò wa èkèleeziyà (mu dicimuna dyà cikondo cyà èkèleeziyà eci) ùvwa ne cyà kupeta dibwe. Ne mu dibwe edi . . .

²⁸ Mpindyewu, twètù kwangata “dibwe” adi ne kudifwànyikija, didi dyùmvwija “lubwebwe.” Ncinyi aci? Mwanjèlò ùvwa mwà kwikala mufwànangane ne Peetèlò, wàkabùkidiibwa ne “dibwe.”

²⁹ Tudi tujandula ne dîna dyèbè didi ne bwenzeji bùdidi ditwàla mu nsòmbelu webè. Mpindyewu, ncyèna mwà kutàmba kuya ne aci to, bwalu dyabùlù ùtu ne dibadika dyà bishifèri dyà mafi; bwà aci kaayi tudi bamanyè's; ùdi ubanga kupèèsha bantu *dicimka*, ne bikwàbò mùshindù awu, bikabàfikisha mu ditèndeleelela dyà bakishi. Nènku ditèndeleelela dyà bakishi ncintu

cyà dyabùlù. Tudi bamanyè aci. Nènku ke mùshindù awu, bìdi bikèngela bwà nwènù kutàbaleela. Bu mùvwabo . . .

³⁰ Cìdi cyènza ne bàakabiikila Yesù “Beelèzèbùlà,” “dyabùlù,” mbwalu, nudi numòna’s, Yèyè ùvwa mwà kujingulula meeji à mu mitù yàbò. Nwamònu’s, kàdi Yèyè ùvwa Dìyi dya Nzambì. Nènku Ebèlù 4 mmwámbe ne: “Dìyi dya Nzambì, nditwè kupita mwele wà mvità wà nseke yìbidì, dijinguludi mene dya meeji à mapàngadika à mu mwoyi, meeji.” Nwamònu anyi? Pa nànkù, Yèyè ùvwa Dìyi, Yèyè ùdi Dìyi dìdì ne mwoyi, ne Dìyi dìdì ne mwoyi dìdì dìbwela munda mwètù ne pashìishe Dìdi ditwàla bipeta bimwèbimwè pa twètù. Nwamònu’s, bimwèbimwè, bwalu Dìdi n’Dìyi dimwèdimwè adi. Nwamònu’s, Ncintu cìmwècìmwè aci munkaci mwètù. Nènku ki mùshindù ngwòwò awu. Nènku misangu mikwàbò aba bàdi kabàyi mu cipidì aci bàdi bàakula mu myakulu, ne mukwàbò ùyàndamuna. Ncinyi aci? Dìyi divwijìbwe mubidi munkaci mwètù cyàkàbìdi.

³¹ Nènku pashìishe, tudi tumòna dìbà adi ne mwanjèlò ewu ùvwa mwà kupeta . . . mwanjèlò wa cikondo cyà èkèleeziyà uvwa mupete “dibwe.” Cìvwa n’dibwe *ditòòke*, kadiyi dyumvwija ne bwakàne bwèndè yèyè mwine to, kàdi “bwakàne bwà Nzambì Yèyè mwine.”

³² Nènku mu dibwe edi mùvwa “dìna,” dìna divwà muntu nànsha umwe kàyi mumanyè to ànu ewu uvwa mudyakidile nkaayendè. Yèyè ke uvwa mudìmanyè, kàdi kakùvwà mungà muntu uvwa mwà kudìmanya pa kuumusha yèyè awu to. Nànkù paùdì umvwa balumyàna aba bakulaabidila, bakwambila ààbò; mbaa “Yone,” mbaa “Pòlò,” mbaa “Màriyà,” mbaa “*cikampànda*,” “*cikansanga*,” anyi “*cikankènga*.” Kuciitàbùùjì to, bwalu bu byòbì nànkù, kàvwa kwikala nànsha mubùtèèjekù nànsha. Nwamònu anyi? Ncyà bushùwà. Bikèngela àdìlamè bwèndè yèyè. Ùvwa mumanyè. Muntu nànsha umwe kàvwa mumanyè to ànu yèyè nkàayendè, kàdi yèyè ùvwa mumanyè bwalu mucimunyi yònsò mupwangane ewu ùtu ùpeta dìna dipyadiyà mu mùshindù awu—awu—awu.

³³ Nuvwakù bamòne ne Abraham ùvwa ùbìikidiibwa ne Abram, kàdi pàakayà Nzambì bwà kukwàta nendè mudimu, Wàkashintulula dìna dyèndè mu “Abraham.” S-a-r-r-a ùvwa Sarra, kàdi pàvwà Nzambì ujinga kukwàta nendè mudimu, Wàkashintulula dìna dyèndè mu S-a-r-r-a-h: Sarah, “mwànà wa mfùmù mukàjì.” Nudi bamanye ne Yakòbò . . .? Yakòbò ùvwa “munyengyanganyi wa myaba yàbèndè ku bukolè.” Esau mbwena kwamba ne “mukùnze,” wa myòsà ne mukùnze; nsukì mikùnze, ne mukùnze mubidi mujimà, ki Esau. Mpindyewu, ne Yakòbò ùvwa “munyengyanganyi wa myaba yàbèndè ku bukolè.” Nènku *munyengyanganyi wa myaba yàbèndè ku bukolè ùtu* “mudìngyanganyi.” Esau kàakambaku ne: “Dìna dyèndè kí n’Yakòbò, ‘munyengyanganyi wa myaba yàbèndè ku bukolè’ anyi?” Kàdi pàakalwanganaye ne Mukalenge bufukù bujimà,

ne kucimunaye, ne kubèneshiibwaye, Nzambi wàkashintulula dîna dyèndè; Yakòbò kulwa *Izàlèèlà*: “mwànà wa mfùmù ne Nzambi.” Pòlò ùvwa ùbìikidiibwa ne *Shawùlà* too ne pàakatwilanganàye ne Nyumà Mwímpè mu mmwènekèlu wa Bukènkè bwàkamuteemenà pambidi pèndè abu, dîna dyèndè dyàkashintuludiibwa kuumuka ku Shawùlà kulwa “Pòlò.” Simona, pàakatwilanganàye ne Yesù, Wàkashintulula dîna dyèndè mu “Peetèlò.” Aci. . .

³⁴ Nènku pàakacimuna Yesù, Dîna Dyèndè dyàkashintuludiibwa. Ne Yéyè neàbuululè Dîna adi: “Ewu wíkala Nèndè awu, wàcimuna mùdiYe mucimune amu, neàpete dîna dipyadiyà; ne Mémè némubuuulwilè Dîna Dyànyì dipyadiyà.” Nwamònu anyi? Nènku mucimunyi yònsò, ndi muswè kwamba ne, munkaci mwà bàà bwena abu: balombodi abu ne bikwàbò. Mpindyewu, bàna bàà Izàlèèlà bwònsò kabààkashintuludiibwa dîna to, mu bushùwà bwà bwalu. Ncyà bushùwà. Kàdi balombodi banène abu, pàakacimunaò, bààkapeta dîna dipyadiyà. Nwamònu mùdìbi bìnwangana anyi? Ànu mu byòbi menemene.

³⁵ Nènku mpindyewu tudi tujandula ne yéyè kàbidì ùdi upeta “mana masokoka.” Mpindyewu, mana masokoka ncimfwànyì cyà màmpà à bakwidi. Màmpà à baakwidi àvwa mbwà baakwidi nkààyaabò. Ncyà bushùwà. Màmpà à baakwidi àvwa ànu bwà mwakwidi. Nènku bòbò. . . Civwa ncintu cyà pabwàcì cyenza bwà mwakwidi, mbwena kwamba ne, balombodi; ne muntu ewu wàkacimuna. Disangisha dijimà òvwa dipeta mana, kàdi yéyè ùvwa upeta *mana* (à pabwàwù) *masokoka*, anyi “*dibuulula dyà pabwàdi*,” kaa, dyà ne Yesù ùvwa nganyi, ne byònsò bìdì biMutàngile, byònsò bìdì biMutàngile. Nwamònu’s, yéyè ùdi upeta dibuulula adi pàdiye mucimune. Kùdì mwanjèlò: “Shààla mukwàte bikolè, bwalu ewu udi. . .” Yéyè wàkacimuna. Ùdi wàmabila *mwanjèlò* wa èkèleeziyà. Nwamònu anyi?

³⁶ Mpindyewu netùsanganè pashiishe, dilòlòlò edi, tudi tubangila ku:

. . . kùdì mwanjèlò wa èkèleeziyà wa *Twatilà fùndà ne*:
Maalu aa ngàdì Mwànà wa Nzambi wàmba, ewu udi
ne. . . mèsù bu. . . ndimì yà kapyà, ne makàsà èndè. . .
bu cyamu cyà kabanda cilenga;

³⁷ Mpindyewu, patùdì tuMumòna mu Cikondo cyà kumpàla, cyà Efèsò, anyi ku mbangilu wa kumpàla wa Bwàkabuuulwibwà, tudi tuMumòna mu bibadi mwandamutekète byà ngiikàdilù Wendè mutùmbishiibwe awu. “Nsukì. . .” Tudi tusangana ne Yone wàkaMusangana mu ditùkù dyà Mukalenge.

³⁸ PàdiYe ùlwa mpindyewu, Yéyè ùdi Mwakwidi. PàvwàYe pa buloba apa, Ùvwa Mupròfetà, Mupròfetà wa Nzambi. Mpindyewu Yéyè wàkangata Mashi Èndè Sungasunga ne kuya kumpàla kwà Taatù, ke cidi cìMuvwija Mwakwidi. PàdiYe

wàlukila Yèyè neikalè Mfùmù. Mupròfeta, Mwakwidi, ne Mfùmù. Yèyè ùvwa Mupròfeta wa Nzambi, Ùvwa Mukankù. Ùvwa Mwakwidi wa Nzambi, Ùvwa Mwànà wa mùkòòkò. PàdìYe wàlukila, Yèyè neikalè Ntambwe, Mfùmù, (cisàmbà cyà Yudà) bwà kukòòkesha.

³⁹ Kàdi munkaci mwà mudimu Wèndè wa Bwakwidi, mumanè kushiya mwaba wa cijila, díbà adi tudi tuMusangana mwimàne mwaba awu. Ne Yone wàkamba ne yèyè ùvwa mu Nyumà mu “ditùkù dyà Mukalenge”; kì nditùkù dyà mwandamutekète to, kì mmu dyàlumingu to, byònsò adi mbyà mafi. Tudi tujandula aci, bacikenkète mu Mifundu, cívwa nditùkù dyà Mukalenge. Edi ke ditùkù dyà muntu. Dilwa dyà Mukalenge nediikale ditùkù Dyèndè.

⁴⁰ Nènku tudi tumusangana mu ditùkù dyà Mukalenge. Nènku, pààkamònaye Mukalenge, Ùvwa ne “nsuki mitòòke bu nèjè.” Nènku tudi bamanyè ne aci cidi cileeja nzuji.

⁴¹ Cìngà cintu, Kàcívwa Mwakwidi díbà adi to, bwalu Mwakwidi ùvwa muswikile mukàbà lwà mu cifùka, mbwena kwamba ne *mudimu*. Kàdi Yèyè ùvwa muswikile mukàbà lwà pa cyàdi, lwà kuulu *eku*, cívwa cyùmvwija ne Yèyè ùvwa *Nzuji*. Amen! Ne tudi tuMumòna wèndela munkaci mwà bitèèkedi byà myèndù mwandamutekète byà ngòlò abi.

⁴² Kàdi mpindyewu tudi twalukila kùdì “Mukùlùmpile Matùkù,” mwikale ne nsuki *mitòòke* ku Nkwasa Mutòòke wa Cilumbulwidi pààkaMumòna Danyèlè ne: “Kulwa kùdì Mukùlùmpile Matùkù Mwena nsuki yìvwa mitòòke bu nèjè.”

⁴³ Mpindyewu ne: “mitòòke.” Banzuji bàà kale bàà cyena Angleterre mu bidimu byònsò, bàvwa ne ciibidilu cyà kwikala, pàvwabo baya ku cilumbulwidi bwà kukosa bilumbu bàvwa bàvwàla kafulu kanène kàà nsuki mitòòke, kafulu kàà nsuki mitòòke bu nèjè, bwalu bàvwa banzujì. Nènku Yone wàkaMumòna mu ditùkù dyà Mukalenge, pàvwàYe Nzuji. Amen!

⁴⁴ Mpindyewu tudi tujandula ne “Ùvwa ne mèsù bu ndimi yà kapyà.” Mèsù àvwa bu ndimi yà kapyà awu díba adi . . . Musangu kampànda mèsù awu àkabwicidila ne binsonji byà buntu. Àvwa mwà kwimana ne kudila muntu ùvwa mufwè, kàdi mumanyè ne mu tusana tùtaanu tùvwa tulonda ùvwa ne cyà kwikala kàbìdì ne mwoyi; kàdi cívwa luse lwà buntu. Kàdi paanyimà pàà aci pàvwa bukòlè bwà ne Ùvwa mwà kutàngidila mu nsòmbelu wa muntu ne kumwambila ne ùvwa nganyi ne byònsò bìdì bimutàngile. Bwalu cívwa munkaci mwà kulwa mpindyewu mu dileejiibwa edi bu kapyà. Mèsù àdi mwà kutàngila eku ne eku kwà buloba bujimà, ne kumòna byònsò bìdì byènzekamù. Newimanyine penyì mu Ditùkù dyà Cilumbulwidi? Mpèkaatù yèbè neyishaalè bwàshi kumpàla Kwèndè.

45 Nènkù nudi numòna ne Yéyè ùvwà ne: “Mukana Mwèndè, mupàtuka mwele wà mvità mu—mutwisha nseke yibidi,” utùdi tusangana ne ùvwà *Dìyì*.

46 Tudi bamòne ne makàsà Èndè àvwà “cyamù cyà kabanda” ne bikwàbò, cìvwà cyùmvwija “Cishimikidi Cyèndè.” Wàkadyata lupànza lwà mvinyò wa ciiji cikolè cyà Nzambi wa Bukolè bwònsò, ne kulùdyatakaja ku makàsà ne kwambula mpèkaatù pambidi Pèndè, ne kupatuka, kàdi kusànkisha Nzambi. Ncyà bushùwà. Nènkù cishimikidi Cyèndè ke cyètù cishimikidi:

Pa Kilistò, Lubwebwe lukolè, ndi mwimàne,
(mwàkamba Eddie Perronet.)
Myaba mikwàbò yònsò nduntekà. (Ncyà bushùwà.)

47 Mpindyewu tudi tusangana kaaba aka ne, musangu wònsò pàdiYe ùtwilangana ne cikondo cyà èkèleeziyà, Ùdi wàkulangana naaci mu dimwè dyà ku Mènà à Bunzambi Bwèndè. Mpindyewu tudi tujandula paanyimà pààpa, dyà kumpàla mu mabuulula wònsò m’Bunzambi (Bunzambi bwà kumutù) bwà Yesù Kilistò: “Ndi Ewu wàkadiku, udiku, ne ulwàlwa. Mèmè ndi wa kumpàla, ne wa ndekeelu, Nzambi wa Bukolè bwònsò.” Nwamònu’s, dibuulula dyà kumpàla. Yone kukùdimuka bwà kutàngila cìvwà cyàkulangana nendè. Cyà kumpàla, Ùdi ùdileeya kùdiye ku. . .

48 Mfùmù kanà yònsò ewu, pàdibo bamuleeya, ùdi—ùdi—ùdi ùditèeya; muntu yònsò ewu. “Ndi *Kampànda* pàndi ngààkulangana neenù apa, kanwèna bammanyè to. Ndi William Branham, ndi *John Doe*,” ní nganyì ní nganyì awu.

49 Yéyè wàkamba ne: “Mèmè ndi wa kumpàla ne wa ndekeelu; Ewu wàkadi ne mwoyi ne mufwè; ne mwikàle ne mwoyi bwà kashidi ne kashidi.” Kaa, ekèlekèle! Bunzambi. S’ki twètù aba tuMumòna mu bibadi mwandamutekète byà mmwènekèlu Wèndè wa ngiikàdilù Wèndè mutùmbishìbwe awu. Mu cikondo cyònsò cyà èkèleeziyà Yéyè—Yéyè ùdi wàkulangana naabo mùshindù mushiilàngàne wà bunzambi abu, mu mùshindù mushiilàngàne wà ngiikàdilù mitùmbishìbwe ayi.

50 Mpindyewu, dilòòlò edi, Nyèwù ùlwa ne kapyà kàà kèèla ndimi. Nyèwù mpwèkeshe mèsù mu Laòdikiyà. . . anyi mu Twatilà. Eci ki cikondo cìdi èkèleeziyà musèdìbwe mu cyena Kàtòlikè ne cimpàngaanù, anyi cyena Nikàlàwù ne cimpàngaanù bidìswike pàmwè mu dibàkà ne bidyènze cimùku ne bilelè èkèleeziyà wa kumpàla, èkèleeziyà muvwija bulongolodi.

51 Ki Nzambi kwamba ne byenzi byà beena Nikàlàwù (bìvwà mu Efèsò abi), lwà mu—mu èkèleeziyà mukèsè wa Peegàmò kulwabi “dilongesha,” ne kwamba ne cìvwà “dilongesha dyà Baalàmà.” Ne Baalàmà ng’ewu wàkalongesha Izàlèlà bwà kuyayè kuntwaku ne kwenda masandi, anyi kwenda masandi ne Moàbà (uvwa mwikale cidimba cyà civùmvù cyà èkèleeziyà),

anyi èkèleeziyà wa patupù ewu, bulongolodi bunène. Nènku tudi tujandula ne Nzambì mmwambè ne, dilongesha dyà beena Nikàlàwù adi òwà. . . kwangata . . . kupèesha èkèleeziyà bukolè bwònsò ne kumushikika ku luseke ne kumuvwija bulongolodi, kwambaYe ne: “Wèwè udi mucikine, ne Mémè pàànyì ndi mucikine.” Ùdi ànu mutùngùnuke ne kwamba ne: “Mucikine! Mucikine! Mucikine!” Kàdi’s ncyòci eci citwè ntanga cibwe *mwab’ewu*. Nudi numòna mùdi èkèleeziyà mufinakaja mwaba awu, ànu lwà *apa* too ne mùdiye ùshààla ànu kantu kakesè menemene, nènku’s ki èkèleeziyà utùdi twamba mpindyewu awu.

52 Mpindyewu, mu ditùkù dyàkalwà dibuulula edi edi, anyi dyàkambilabo èkèleeziyà ewu, òwà nditùkù dyàkadì Loomò mwibakile pa mabwe manène à mwaba wèndè awu, ne bisoosà ne nsonà. Kàdi Ùdi ùditèèja kùdi èkèleeziyà ewu ne “Yèyè ùcidi ànu kapyà kàdi kàlakuka kàdi katàngile munda mwà cikondo, ne cishimikidi Cyèndè kî ncyà bisoosà, ne bikolakola nànsha, kàdi ncyamu cyà kabanda cishile, citeeta mu cikùtù cyà kapyà.” Cishimikidi ncyà bushùwà. Ndi munangè aci. Tudi bamanyè mwaba wutùdi biimànyine.

53 Èyo:

Ndi mumanyè byenzedi byèbè, ne dinanga dyèbè, ne mudimu wèbè, ne diitabuuja, ne lutùùlù lwèbè, ne byenzedi byèbè; ne byà ndekeelu—byà ndekeelu mùdibi bitàmbe byà kumpàla.

54 Èyo, èkèleeziyà ùdi ùmwèka bu udi mumane kushipiibwa yònsò, ànu kànkenyinkenye kakesè, ne bàkaavwa balekele masangisha manène à nyumà, ne bàkavwa benze ànu bu beyèmène byenzedi. Nzambì kàtu muswè bwà twètù kweyemena byenzedi to.

55 Aci’s ncimanyinu cyà ndongolwelu. “Tudi tutwadila Mandamu Jones ndambù wa nkunyi. Nènku netùtwàdile *Kampànda*, bânà bèndè, kuntwaku ndambù wa bilàmbà.” Nènku aci’s ncimpè. Kàdi, kanwèyemenyi aci to, kanwenjiku nànkù to. Mwanèètù, aci—aci—aci’s mbyenzedi bimpè; mwena mwàbò mwimpè, wa kaneemu neénzè nànkù. Kàdi cidi cikèngela bwà kwikala mwena Kilistò ndilabula dyà dilediibwa dyà cyàkàbidi, dibàtiiza dyà Nyumà Mwimpè. Èyo.

56 Bashèèkèlèke, bàakadifila ku byenzedi pamutù pàà dinanga ne diitabuuja, bamòngane ànu ne kushèèkeleka dîbà dyònsò pàvwa cikondo cyènde cîya apu.

57 Èyo:

Ndi mumanyè byenzedi byèbè, . . . Ndi mumanyè diitabuuja dyèbè, ndi mumanyè lutùùlù lwèbè, ne bikwàbò . . .

58 Kàdi mpindyewu netwàngatè mvensà wa 20, tèèlejàayi eci:

Nànsha nàнку ndi ne ndambù wa bintu bìndi nkupùisha naabi, bwalu wéwè udi mwanyishile mukàji awu Izàbèlà, udi udibìikila mùdiye muprófeta awu, bwà kulongesha ne . . . kuseeswisha basadidi bàanyi ne ku dyenda masandi, ne ku didyà bintu bilàmbula mpingù.

⁵⁹ Mpindyewu: “mukàji.” Ncinyi citùvwa bajandule civwà mukàji ùleeja makèèlèlà dilòòlò awu? “Èkèleeziyà.” Mpindyewu, mpindyewu tudi tujandula kaaba aka ne bàakabiikidiibwa ne “beena Nikàlàwù,” “dilongesha dyà Baalàmà,” nènku mpindyewu cikaadi cikafike kùdì “Izàbèlà.”

⁶⁰ Mpindyewu: “Izàbèlà.” Bu nwènù mwà kumòna, eci mbwalu-bulonda bunène. Mpindyewu, wéwè muswè kucifùnda, kubangila mu Bakalenge wa Kumpàla, lwà ku . . . Bakalenge wa Kumpàlà, lwà ku 16. Izàbèlà kàvwa mwànà wa bakàji wa Abraham to; nànsha kasumbù kàdi apa aka, Loomò wa cimpàngaanù. Beena Nikàlàwù civwa mmusumbà wà beena Kilistò wà mashika, wa mmwènekeli wa kwisùkwisù bàvwa baditápùlùle ne beena Kilistò balelèlà ne: “bàmwèka kabàyi ne Diitabuujà to.” Nènku kuswàbo bwà kuvwija èkèleeziyà diswa, ànu cimwècimwè cidìbo naaci leelù ewu; cyènze bu diswa, kamùyì Nyumà mu cyòci nànsha wa mafi to; “Matùkù à bishimà àkaadi mamanè kupìta. Byònsò abi bìvwa bwà cikondo cikwàbò. Tudi ne bwànà bwètù.” Franc-Maçon mwímpè yònsò ewu, Muntu wa Pabwèndè, anyi cintu kanà cyònsò bu nàнку cidì cipàtula byà nàнку. Nènku aci kacýèna ne bwalu to, kàdi aci kacýàdyàkwangataku kaaba kàà dilediibwa dipýadipýà mu Yesù Kilistò to, lupàndù lwà musùukà, ne Bulelèlà ebu.

⁶¹ Èyo, Izàbèlà ewu. Mpindyewu yèyè ùvwa mwànà wa bakàji wa Abraham, aci ncilelèlà, mushikankùnde wa mukuukwidi wa mpingù. Mu cikondo aci pàvwa dikù dyà bumfùmù, dikù dyèndè dyà bumfùmù, dipetè lumù ku lulamatu lwèndè lwà cikisu kùdì Baalà apu. Tatwèndè ùvwa mwakwidi wa lupingù lwà A-s-t-a-r-t-e (Ncyèna mumanyè munùtù nucishindumuna to, ndi mucibakule ànu mu maalu-malonda). Aakàbà wàkenza mayelè bu Constantin. Ditùnga dinène dyà bukòlè edi dyàkadyàdija ànu ku luseke lwà Izalèlèlà, ki bwà cinyi . . .

⁶² Ncinyi cyàkenza Constantin dilòòlò dishàale adi? Kàvwa mukùdimune mucima to. Yèyè ùvwa mwena cidìidi. Civwaye ùteeta kwenza ncinyi? Wàkangata beena Kilistò, pàakamwambilàbò ne bàvwa mwà kusambila . . . (Nènku mpindyewu kuntwaku, vùlukàayi ne, ùdi wàk- . . . tudi twakula mpindyewu bwà beena Nikàlàwù). Ki kwambayè ne bu bwòbò mwà kusambila, ne yèyè mufwànyine kucimuna mvità eyi, díbà adi ùvwa mufwànyine—ùvwa mufwànyine kwikala mwena Kilistò. Wàkapeta cilòòtà. Kufiitaye ngabu yèndè ne mpenci mutòòke, dilòòlò adi, wa nkùrusè. Mwaba wàkatwàdijila Babàndì bàà pa tubalu bàà Colombe, ànu mu cikondo aci mene; mpindyewu s'ki mwaba wàkiimanyinabo awu. Kàdi

kààkenzaku cintu nànsha címwè bu mwena Kilistò to! Pa umwe wa ku èkèleeziyà yà beena Nikàlàwù, úvwabo babiikila ne Sophie Munsantu, kwasapù nkùrusè. Anu mûmvwà ngàmba dilòòlò dishààle, ki cintu címwèpelè cyàkenzaye cyàkumvwika bu ne ncintu cyà ne yèyè mmutwè ku cyà èkèleeziyà, bwà ku byònsò bìndiku mwangùlùle mu dibèji dyònsò dyà maalu-malonda; ne bamanyi bakwàbò bàà mabalà bààbùngì mbàmbe cintu ànu címwècimwè aci. Katwèna bamanyè kantu nànsha kàmwè pa dikùdimuna dyèndè dyà mucimà to, mpindyewu. Kàdi wàkadìtwa mu cinyi? Cintu ciwwaye muswè kwenza ncyà ne, wàkatàngila bààbùngì bàà mu Loomò, mpindyewu.

⁶³ Mpindyewu tàngilàayi eci, tabaleelàayi diyelè edi. Kàdi tàngilàayi numòne mùdi Bible ucishindika, Nzambì, nkàmà ne nkàmà yà bidimu kumpàla kwà kwenzekaci. Nènku Constantin wàkenza diyelè òmwèdimwè adi, mùdi Nzambì mwambe mwab'ewu, dyàkenza Aakàbà adi.

⁶⁴ Mpindyewu, Constantin wàkamòna ne citùpà cinène cyà bantu bèndè bàvwa beena Nikàlàwù aba, beena Kilistò. Bàmwè bàà kùdìbo bàvwa bàbàbiikila ne “baabuludyanganyi,” ki beena Mpenta abu's; bàvwa “baabuludyanganyi ne bansantu babunguluki bàà mu malaba,” ne bikwàbò kàbìdi. S'ki mwaba ùdi bimanyinu byèbè bilelèlè ne maalu à kukema byelèle kàata awu. Kàdi èkèleeziyà *wa mu mubidi* dìbà adi úvwa wènda uya mutàngile ku bulongolodi. Cyàkenzaye ncinyi? Constantin wàkatwa dinàya dyà budimù. Wàkaya kuntwaku ne kwangata balunda bèndè bampàngaanù, ne kwangata balunda bèndè beena Kilistò, kàdi kusangisha èkèleeziyà ayi pàmwè, kutèeka ka—ka. . . kubweja cimpàngaanù mu bwena Kilistò. Ki bwena Kilistò ne cimpàngaanù kusèlanganabi mu èkèleeziyà wa Pègàmò.

⁶⁵ Mpindyewu, Ùdi wàmba cinyi kaaba aka dilòòlò edi? Cintu címwècimwè cyàkenzà Aakàbà aci. Aakàbà, bwà kukoleshaye bukálenge bwèndè, wàkasèla Izàbèlè, mukàji mukuukwidi wa mpìngù ewu; bwà kukolesha bukálenge bwèndè, bwà kubweja makàndà àbùngì mu Izàlèlèlè.

⁶⁶ Nènku's ki cidì èkèleeziyà yìteeta bwà kwenza. Nudi numòna mùdìbo bateeta kwenza Bible, nebàmupàtule cidimu cyàlonda mu 1962 anyi? Ne m'Bible wíkala mwà kusànkisha beena Yudà, neikale mwà kusànkisha beena Kàtòlikè, ne kusànkisha beena Mishònyì. Kaa, mwanèètù! S'ndi ne cibèjibeji cyà bwalu abu. Ncyèna naaci dilòòlò edi to, s'nwàkangumvwa ncibala dilòòlò kampànda nànkù. S'ki bwalu mbwòbù abu, nudi numòna's.

⁶⁷ Kaa, bintu abi bwà kuteeta kuvudija bùngì's! Bàdi bàngata bintu byà cijila byà Nzambì ne bàbitangalaja mu mishindù kanà yònsò, bwà kuvudija ne kupeta misùmbà yàbùngì. Ki cyàkenzà èkèleeziyà ncyòci aci. Wàkabweja bantu mweyèmene pa dilabulangana dyà ku byanza, kàdi kupeta bantu bavile

diitabuuja bapite ne bikwàbò byònsò, bantu kabàyi bakùdimùne micimà nànsa. Kàdi mu Mubidi mulelèlè wà Kilistò, ùdi kawùyi bulongolodi to, kàdi Mubidi musokòme—musokòme wà Kilistò, udi mwà kubwelamù ànu cyanàànà mu njila umwèpelè, ne mwine awu nku dibatiiza dyà Nyumà Mwímpè. Cyà bushùwà! Nènku bimanyinu bimwèbimwè byàkalonda bàpostòlò abi, bìdi bilonda Èkèleeziyà. Aci's ncyà bushùwà menemene!

⁶⁸ Mpindyewu, kabyèna bikèngela bwà twètù kudyà cibanga kwamba ne: “Èè, netùkadisangè ne beena Assemblées. Netùkadisangè ne ba-Unitaires. Netùkadisangè ne *cikampànda*, anyi ba-Baptistes, anyi ba-Méthodistes.” Tudisangaàayi ne Kilistò! Kanùdiswiki ku bintu ebi to. Bwalu bwònsò bwà ku malongolodi aa bùdi ànu bwímpè, kàdi àdi—àdi ne malongesha àawù ne bintu byàwù, nènku bikèngela bwà wèwè kuya kamòna mutàngidi wa bwònsò ní ùdi mwà kukwitabila bwà ùbwele mu ditùnga adi bwà kwenza masangisha. Piikalàbi ne kwena ulongesha ànu menemene mùdibo balongesha to, bàdi bàkwela pambèlù, kwena mwà kushàala ne Bible nànsa. Nzambi kèna mwà kwenza nànkù to, Yèyè mmucikine. Mwena Kilistò yònsò muledibwe cyàkàbìdì ewu neàcikine pèndè. Bantu bààbúngì bàdi pambèlù pàapa kakùyì mpatà to bàdi. . . mbaswè kwenza, mbaswè kusadila, ne mbaswè kwenza bwobùmwe. Kàdi kwena mwà kucyènza to, s'nebàkwele pambèlù. Èè, lekela bàkwele pambèlù, tungunuka ne kuya, peta Nyumà Mwímpè nànsa byà munyi. Ncyà bushùwà menemene. Kàdi, nudi numòna's, bwòbò—bwòbò mbaswè kupeta dìyì diswika adi—adi. Mbaswe kuya neebè mwaba ùdi upeta mfranga mipitèpite búngì awu. Ba-Baptistes bàvwa ne cifidi mu cidimu cyà 1944 cyà ne: “Mùliyò mukwàbò mu 1944.” Cyàkapetabo ncinyi?

⁶⁹ Ànu mwàkamba mutangadiki munène ewu Billy Graham, pàvwàye mu Louisville apu ne: “Ndi mbwela mu cimenga. . .” Yèyè ne: “Pòlò Munsantu ùvwa mwà kubwela mu cimenga, ùkùdimwija muntu ùmwèpelè mucimà; wàlukila cidimu cìvwa cìlonda ùdi—ùdi upetela makumi àsàtù ku ùmwèpelè awu; bàna bàà bàna bàà bàna bàà bàna bàà bàà bàna bàà tunkànunwìnà, bafùmine ànu ku ùmwèpelè uvwa mukudimune mucimà awu.” Yèyè ne: “Mèmè ndi mbwela mu cimenga, mbiikila binunu makumi àsàtù bajuuka, dyà ngàalukila cidimu cìdì cìlonda ncyi mwà kusangana makumi àsàtù to.” Kàdi cyàkambaye, yèyè—yèyè kwamba cishimbì-diyi, kàdi ncyèna ànu ngiitabuuja ne mwanèètù wa mushinga mukolè ewu ùvwa mubinge nànsa. Yèyè ne: “Nwènù bayiishi beena lulèngù aba.” Yèyè ne: “Nennupèesha mènà ààbò ne myaba yidìbo basòmbèle, nushàala kacya basòmbè batentèke makàsà ènù pa bìrò nubàfùndila mukàndà pamutù pàa kuya, kuyiikilangana nààbò.”

⁷⁰ Ndi—ndiku mmwanyisha bwà aci. Ntu muswè muntu ikale cidiye, kàyi mwena lubombo nànsa; shàala mwimanè ànu mwaba ùdi awu ikala wèwè cyùdi aci. Nènku ntu muswè aci's.

Kàdi ndi muswè kwamba ne: “Billy, nganyì uvwa kuntwaku bwà kubèja mwinè mukùdimwisha mucimà wa Pòlò awu? Billy, cìvwaku ncyà ne, wèwè ànu mwà kwimanyika dibàlekela dyà bàya kalabulangana ku byanza, ne bàjuuka, bàmba ne: ‘Èyowa, ndi ngiitaba Yesù bu Musùngidi wanyì sungasunga,’ kàdi kumufikisha ku dishààla mwaba awu too ne mùdiye ùfwa ùbola, ne ùlediibwa cyàkàbìdì ku Nyumà Mwímpè, yèyè awu neàkùdimwishe bantu bapyabàpyà micimà.”

⁷¹ Mwanèètù, udi...ùdi ùlàkuka ne kapyà, kwèna mwà kumukànda nànsha. Yèyè’s ùdi bu nzubu mukwàte kapyà mu cipeepèlè cìkolè, kwèna mwà kumujimà to. Kaa, ùdi ùmwangalaja myaba yònsò, mwanèètù, muntu mukùdimune bulelèlè mucimà kùdi Kilistò, kèèna mwà kushààla mupùwè to. Yèyè ùdi ànu...ùdi mu lùbilu. Kaa, ndi ne disànkà dyàbùngì be! Kaa, ekèlekèlè! Dibàtiiza dyà cyena-kale dyà Nyumà Mwímpè didi ditèemesha kapyà mu musùukà wèbè! Kwèna mwà kushààla mupùwè to, lupeepà munkacì mwà kukutuuta, cipeepèlè cìkolè cyà cìvuma necitùngunuke ànu ne kukulàkwisha ne kapyà. Mòna’s ndi ànu mutùngunuke ne kusakidilakù nkunyi, ne ntùngunuka ne kuya mutàngile kumpàla. Èyowà’s, mukalenge! Muntu nànsha umwe kàvwa ùkakànkamika mukùdimune mucimà wa Pòlò nànsha, Pòlò ùvwa ùya nendè bikolè mu ndòndò mu Kilistò too ne pàvwàye ùfwa mu yèyè mwinè, ne ùlwa ne mwoyi mu Kilistò, nènku Yèyè ke uvwa wenza bìdì bishààle abi. Ncyà bushùwà! Ki cidì bwalu.

⁷² Bàna bèètù ba-Baptistes bàdi bìmpè. Kàdi mùliyò mukwàbò, ùdi ne dikwacisha kaayi? Nudi bapete ànu mùliyò mukwàbò wà mènà. Èè, sòmbelàayi ànu panshi nukwatakaje àmwè mènà panwikalà baswè kuèlamù. Abi’s mbìmpè, kàdi, mwanèètù, citùdi baswè mmènà mu Mukàndà wà Mwoyi wà Mwànà wa mùkòòkò, wàkashipiibwa ku difùkà dyà dyulu ne buloba, musukula mu Mashi, mùle tètè ne Nyumà Mwímpè, bimanyinu ne maalu à kukèma bikulonda.

⁷³ Kenkètaayi mu maalu-malonda. Ndi njingaku ne nwènù bwònsò nwàpetaku Nsangilu wa Nicée bwà kubala bintu abi, bwà kumòna mmwàkadì bafwile diitaba abu balame cimunyi cyà kapyà cyà mpenta aci. Nènkwabìlè mpindyewu, mwanèètù, nwènù ba-Baptistes, ba-Méthodistes, ne cyònsò cyùdi aci, Bukènkè bulelèlè ne bushùwashùwàlè...kí mbulongolodi bwà cyena Mpenta nànsha, mpindyewu; kàdi Bukènkè bulelèlè, bushùwashùwàlè n’Dilabula dyà Mpenta. Kwaka...Ngénjì matùkù ne matùkù mpindyewu, mu maalu-malonda awu, kuwòndola wònsò ne mwànyì mwònsò mùmvwà pàànyì mwà kwenza amu, ne cintu’s ncimunyi cyà kapyà kàa mpenta aci cyàkashààla ne mwoyi kacya ku Mpenta too ne lelù ewu. Èyowà’s, mukalenge! Bààkacipuusa kucyela ku luseka.

⁷⁴ Bàmwè bàà kùdìbo bàdi bàmba ne: “Èè, ekèleeziyà munène wa Kàtòlikè ewu ukaadi mukàndàmèène mavwala awu. Mòna’s,

cidi cijaadika ne yêyè ùdi Èkèleeziyà mulelèlà.” Mòna’s, aci kî ncintu cyà cikèmesha kùndi to, mwikale ne mbulàmàtadi ne bintu byònsò paanyimà pèndè, ùvwa ànu mwà kutùungunuka. Kàdi cidi—cidi cikèmesha, nkasùmbù kakesè kàvwa kiimansha aku, banyàabanya bakesè abu, beela pambèlù, beela mu bùlokò, bakòsolola tupesetupese ne scie. Mmunyì mwàkatùungukabo? Bwalu Nyumà wa Nzambi udi ne mwoyi ùdi ùkwàta mudimu mu buumùntù bwàbò. Ne démons yònsò yà ifernò kayènakù mwà kuMutàmba bukolè to! “Pa lubwebwe elu Nèngiibakilèpu Èkèleeziyà Wanyi, ne biibi byà ifernò kabyèna mwà kuMutàmba bukolè to.” Ki cintu cilelèlà ncyòci aci. Ki cidi cìfila Nyumà Mwimpè kùdi bayiishi bàà ba-Méthodistes aba, ne bakwàbò, kaaba aka. Nwamònu’s, cidi cibàfikisha ku dijuukila kuulu, cikwenzela cintu kampànda. Kacyàdyàkupangilakù to.

⁷⁵ Aakàbà, mwena lubombo awu. Nwamònu’s, ùdi ùya kuntwaku, wàmba ne: “Mpindyewu, bu mèmè ànu mwà kuDisanga mpindyewu, ne kupeta ditùnga dinène edi. Nènkù mèmè mukasèle mushikankùnde wà nsongàalùme wa kale wàwa, èè, aci. . . twètù—twètù netùshàale balunda.” Cìvwaye wènzà aci ncinyi? Munkaci mwà kupàana makenji èndè mene à bwànàbutà.

⁷⁶ Mpindyewu, pàdi èkèleeziyà wa Mishònyì ewu wàlukila *bulelèlà* ne ùdisanga ne èkèleeziyà wa Kàtòlikè, nebyenzè cintu cìmwècìmwè cyàkenzabi kale wàwa aci. Aakàbà wàkadi ne mwoyi mu ditùkù òvwà. . .

⁷⁷ Kùkaadi misangu yisàtù. Ùvwa mu dilabula dyà mundankùlù dyà lwenda lwà Izalèlèlà, ne *apa* cyàfikì kàbìdì ku mundankulu, ne tudi tukafika kàbìdì ku mundankulu *apa*. Nkongo yisàtù kumpàla kwà elu; kubwela *emu*, *emu*, ne *emu*.

⁷⁸ Mpindyewu, nwènù mwà kumòna bìmpè, Aakàbà wàkasèla Izabèlèlà bwà kukolesha cisàmbà cyèndè. Aci’s ki cyàkenza Constantin menemene. Wàkaasa èkèleeziyà munène wa dikèma, ne kwangata cyàltar e kucyenza cyà mabwe à matòoke mafinùnùke, kuvwadika muntu ewu, paapà, kumushikika mwaba awu. Yèyè ùvwa nzambi udi ne mwoyi, ùvwa mwà kwakula nendè, ne—ne kumwambila bwà mpèkaatù yèndè, nènkù aci kàdi kusànkishaci èkèleeziyà wa civùmvù, e kukwàtabò njila kuya. Bushùwà! Ncyòci! Èè, kàdi aci kacyàkasànkisha muntu uvwa mulediibwe cyàkàbìdì awu nànsa, pàakangatabo aci ne pashiishe kubwejamù mishingà yà cimpàngaanù yà kwamba kwà masambila. Cyàkenzabo ncinyi? Kuumushabo Jupiter, kàdi kwalujabo Peetèlò. Kuumushabo Venus, kàdi kwalujabo Màriyà. Ke kubwejacì—kubwejacì cimpàngaanù mu milongo yà beena Kilistò.

⁷⁹ Nènkù pàakasèlà Aakàbà Izabèlèlà, wàkenza cintu cìmwècìmwè aci kàbìdì. Wàkabweja dikuukwila dyà mpingù mu Izalèlèlà. Ne cyàkenzà Izabèlèlà ncinyi? Wàkashipa mupròfeta

yônsò ùvwaye mwà kutwà byanza awu. Ncyà bushùwà anyi? Ki mwàkenza baapaapa. Mwena Kilistò yônsò mulelèlè uvwabò mwà kutwà byanza awu, bàakamushipa.

⁸⁰ Kàdi kùvwa mùtootò wà cikondo aci, Eliyà wa kale awu! Kaa, èyowà's, mukalenge! Yèyè kàvwa ne bwòwà, bwà kubàmbila bwalu abu to. Èyowà's, mukalenge! Ùvwa mùtootò wà Nzambi wà cikondo aci. Kukèèpelabò too ne mwàkambàye musangu kampànda ne: “Mukalenge, ndi mushààle nkààyani.”

⁸¹ Nzambi kwamba ne: “Mpindyewu, anji indila kakesè, anji indila kakesè, anji indila kakesè, Eliyà.” Uh-huh. “Ndi ne binunu mwandamutekète bisokoka eku ne eku, lwà kwaka. Nwamònu anyi? Kwena mumanyè kùdibo bàsanganyibwa to. Bàdi kuntwaku, Bàfaalèsà, Bàsadojà, ba-Baptistes, ba-Méthodistes, ne ba-Presbytériens, kàdi mèmè—mèmè nèmbàpàtùlèmu, anji indila wèwè. Nwamònu anyi? Ndi naabò kuntu kwàka. Kùdi . . . bàdi—bàdi—m'Bàànyi, ne kabèèna bàtwa cinù kumpàla kwà Baalà nànsha.” Kàdi mukulumpe Eliyà ùvwa Dìyi dya Nzambi mu ditùkù adi. Ncyà bushùwà ne ùvwa cimfwànyì cyà Dìyi dya Nzambi ku dilwa dya kumpàla dya Kilistò, ne neciikalè cimfwànyì cyà Dìyi mu dilwa diibìdì dya Kilistò cyàkàbìdì, bilondèshile Mifùndu.

⁸² Mpindyewu, tudi tusangana ne Izàbèlè mukesè ewu, pàakafikàye kuntwaku, ùvwa bushùwà ne cyà kuupula byoshelu byônsò byà Nzambi bwà kujuula byèndè byoshelu. Ke kufikishaye beena Izàlèlèlè ku diinama lupingù. Aci's ki cyàkenzà Constantin menemene pàakenzàye èkèleeziyà wa Kàtòlikè. Wàkabweja cimpàngaanù mu—mu èkèleeziyà wa beena Kilistò, ne kufikisha beena Kilistò ku diinama mpingù. Aci's ke cikondo cyà mîdimà menemene cyàkàbìdì; cikondo cyà mîdimà cyà Izàlèlèlè, cikondo cyà mîdimà cyà—cyà èkèleeziyà; biinama mpingù. Kàdi Eliyà pèndè ke ùvwa mùtootò mu ditùkù dyèndè.

⁸³ Ne kufikisha Izàlèlèlè mujimà ku dikuukwila Baala, nènku ke mwàkenza èkèleeziyà wa Kàtòlikè ku Twatìlè.

⁸⁴ Mpindyewu, ndi muswè bwà numòne ckwàbò cintu cidi cîntwa ku mwoyi mwaba ewu, pâm vwa munkaci mwà kwangata bwalu-bulonda bwànyì ebu. Yesù wàkamba ne mukàji ùvwa . . . ùdibìikila mùdiye mupròfetà. “Mukàji awu Izàbèlèlè, udi udibìikila (ùdibìikila yèyè mwine) mùdiye mupròfetà.” Mpindyewu, nudi numòna's, èkèleeziyà wa Kàtòlikè kàtu wànyishila bantu bàabò bwà kubalabò Bible to bwalu bàtu bàmba ne nsasèrdòsè ki ùmwèpelè udi mwà kumvwija Dìyi adi mu Bunzambi.

⁸⁵ Èè, aci's ndyumvwija dilelèlèlè dya cidi mupròfetà. Mupròfetà ùdi ne dyumvwija dya Nzambi dya Dìyi dya Nzambi. Ncyà bushùwà menemene. Mmunyì mùdi muntu mwà kubìikila umwe, muntu kampànda ne: “mupròfetà” ne pashìshe kwamba ne:

“ùdi ne dibuulula dyà mashimi”? Kí ncyà meeji to ànu mùdi kàbidì bwàna bwà Cyendèlèlè, nudi numòna’s. Nwamònu anyi? Nwamònu’s, cìdi—cìdi. . . *Mupròfetà* mbwena kwamba ne “mumvwiji mujaalàme, muntu mwena kùdi Dìyì dyà Mukalenge dilwila, dibuulula dìdi dilwila kùdìye.” Mwàku *mupròfetà* mbwena kwamba ne “mumvwiji wa Dìyì dyà Nzambì.” Yesù wàkamba ne: “Kwòkò kwikale muntu munkaci mwènù mwikàle wa nyumà anyi mupròfetà, mèmè Mukalenge nêngaàkule nendè. Nènkù pìkàlaci cìdìye wàmba cyènzeke, dìbà adi numutèlèje, Ndi nendè. Pìkàlaci kacìyì cyènzeke to, dìbà adi kanùmutèlèje to.” Kwajiki. Cìvwa—cìvwa n’Dìyì dyà Nzambì dyà Bunzambì, ne Dìyì dyà Mukalenge dìvwa dilwila kùdi bapròfetà.

⁸⁶ Mpindyewu, bàakamba ne *èkèleeziyà* ewu dìbà adi ùvwa “mupròfetà.” Mpindyewu vùlukàayi ne, ncishintulula ku bwena Nikàlàwù ebù mpindyewu, ncishintulula citangija kùdìye “*yèyè mukàji ewu*.” Nudi nucimòna anyi? “Izàbèlà.” Mpindyewu, makèlèlè dilòlò awu cìvwa “dilongesha dyà Baalàmà.” Nwamònu’s: “dilongesha dyà beena Nikàlàwù” ne “dilongesha dyà Baalàmà.”

⁸⁷ Mpindyewu, Baalàmà ùvwa ewu wakafikisha Izalèlèlè ku dyenda dyà masandi. Kàdi ncinyi cyàkenzà beena—beena—beena Nikàlàwù? Bàakenza bulongolodi. Ki kubitèeka byònsò bìbidì pàmwè ke nwènù kupeta *yèyè mukàji*, “èkèleeziyà.” Bushùwà! Bwàkabuulwibwà 17: “Ndumba munène udi musòmbe pa màyi manène.” Mukàji, ndumbà. Nganyi awu, anyi mmunyi mùdiye ndumbà? Ùdi wenda masandi, masandi à mu nyumà, umvwija bantu Dìyì bibì. Umùka ku dikolesha dyà maalù adi! Aci’s ndikolesha dyà maalù ànu dyètù dyà menemene edi. Ncyà bushùwà.

⁸⁸ Mpindyewu, nwamònu’s, yèyè ùdi ùdibìikila mùdiye mupròfetà ne: “Twètù kàdi ki beena bwalu! Twètù tudi nsangilu! Tudi nsangilu wa Laòdikìyà kàbidì, nsangilu wa bantu, ne tudi bapàngàdìke *cikampànda*, ne *cikansanga*, ne *cikankènga*. Pa nànkù tètèlèjaayi twètù!” Kàdi. . .

⁸⁹ Nsaserdòsè mukesè awu—awu kuntweku kulwa bwà kungeela nkonko bwà bwalu bwà Elizabeth Frazier, anyi nsongààkàji ewu Frazier. Yèyè ne: “Kàrdinalè m—mmuswè kumanya ní wikala. . . anyi mwepiskòpò, ní udi mubàtìize nsongààkàji ewu Frazier.” Yèyè ne: “Ùkaadi mulwè mwena Kàtòlikè.”

Mèmè ne: “Èyowà, ndi ngumvwa aci.”

Yèyè ne: “Ùvwa—ùvwa mumubàtìize anyi?”

Mèmè ne: “Èyowà’s, mukalenge.”

Yèyè ne: “Udi mumubàtìize bìshi?”

Mèmè ne: “Mu dibàtìiza dyà bwena Kilistò.” Uh-huh.

Yèyè ne: “Èè, udi uswa kwamba cinyi ku cyòci aci?”

Mémè ne: “Dibàtiiza dyà bwena Kilistò, mùshindù wùdi Bible wàmba. Kùdi mùshindù ànu wùmwpelè wa kubàtiiza mu dibàtiiza dyà bwena Kilistò. Muntu ne muntu mu Bible ùvwa winyijiiibwa mu màyi mu Dìna dyà ‘Yesù Kilistò.’”

⁹⁰ Wàkafùnda, wàkabanga kufùnda mùshindù awu. Yèyè ne: “Udi mumanyè’s, èkèleeziyà wa Kàtòlikè ùvwa ne ciibidilu cyà kwenza nànkù.”

Mémè ne: “Dìbà kaayi?” Mémè ne: “Ndi ne maalu-malonda wònsò à kale mwaba ewu àmwàku mwà kupeta awu, à ku Londre ne myaba mikwàbò kàbìdi.” Bwà ngàmòna mwa kulonga piikala dìbà edi mwà kuseemena kàtataakà, piikala cintu kampànda mwà kwenzeka. Hmm. Mémè kwamba ne: “Ndi—ndi muswà kumanya mwaba awu.” Mvwa mwà kuya . . .

Yèyè ne: “Kaa,” mwàkambàye, “mu Bible.”

Mémè ne: “Udi wamba ne . . . ?”

Yèyè ne: “Yesù ngwakalongolola èkèleeziyà wa Kàtòlikè.”

Mémè ne: “Peetèlò ke uvwa paapà wa kumpàla anyi, dìbà adi?”

Yèyè ne: “Cyà bushùwà menemene.”

Mémè ne: “Mvwa ngèèla meeji ne ‘èkèleeziyà kàtu upangila ne kàtu ùshintuluka to, nènku misà yònsò bàvwa bàyifùka mu Latin bwà kabilù kushintuluka to.”

Yèyè ne: “Aci’s ncilelèlà.”

⁹¹ Mémè ne: “Èè, nudi bushùwà bashintulùle ndambù kacya ànu ku cikondo aci.” Mémè kwamba ne: “Piikalàbi ne Bible awu mmukàndà wa Kàtòlikè, dìbà adi mémè’s ndi mwena Kàtòlikè wa cyena kale.” Nwamònu anyi? Ncyà bushùwà. Mémè ne: “Mémè ndi mwena Kàtòlikè wa cyena kale, dìbà adi.” Ki mémè ne: “Ncyà bushùwà ne cìvwa ne . . .”

Yèyè ne: “Èè, mpindyewu, nudi numòna’s, Bible ùdi ànu bwalu-bulonda bwà èkèleeziyà wa Kàtòlikè.” Yèyè ne: “Nzambì ùdi mu èkèleeziyà Wendè.”

Mémè ne: “Nzambì ùdi mu Dìyi Dyèndè.” Ncyà bushùwà.

⁹² “Dìyi Dyànyì diikalè dilelèlà, ne dìyi dyà muntu mukwàbò yònsò mashimi.” Nènku apa mu Mukàndà wà Bwàkabuulwibwà ki Mukàndà ùmwèpelè (Lekèlaayi ncyambùlùle.) ùtu Yesù mutwepu citampì Cyèndè cyà dyanyisha. Nènku cintu cyà kumpàla cyàkenzaYe cìvwa nkubuulula Bunzambì Bwèndè, ne Wàkacyenza mu kaabujimà. Ke yèyè ne: “Muntu yònsò ùmbushilaKù cintu kampànda anyi kusàkidilaKù cintu kampànda, cintu cìmwècìmwè aci necyùmushiibwe (cìtùpà cyèndè) ku Mukàndà wà Mwoyi. Ewu udi ubala mmubènèshìibwe, anyi ewu udi utèèleja. Ne mwediibwe mulawu ng’ewu wàsàkidilaKù anyi wumushilaKù cintu kampànda.” Ki bwalu mbwòbù abu’s, pa nànkù nudi numòna cìtùpà cyà njiwù.

Nàнку awu kùteeciku kusàkidila cintu nànsha címwè ku Cyòci aci; Cìlekèlè ànu mùshindù ùdiCi awu, kàdi tũngunuka ànu ne kuya mutàngile kumpàla.

⁹³ Nyumà neàkubuulwìlèCi pawikalà ànu mudìpwekèshe, uMulomba. Nwamònu anyì? Ncyà bushùwà. Mpindyewu, nàнку kî m'Bwalu bukolè to. Nzambì... Yesù wàkasàkidila Taatù bwà... wamba ne: “Ndi nKusàkidila, Taatù, bwalu Udi musokoke bintu ebi ku mèsù kwà baalaabi, ne beepiskòpò, ne baakàrdinalè, batàngidi batàmbidile, ne—ne muCìbuulwile bânà bakesè bu bàdi baswè kuyiila.” Nwamònu anyì?

⁹⁴ Ki cyùdi muswè ncyòci aci. Ndibuulula dyà Nzambì didi mwà kulwa ànu mwàkambàYe mwaba awu ne: “Bantu bàdi bàmba ne Ndi nganyì?”

Yèyè ne: “Wèwè udi Kilistò, Mwànà wa Nzambì udi ne Mwoyi.”

⁹⁵ Yèyè ne: “Simona, kutukù muciyiile mu sèminèrè kampànda to. Nwamònu anyì? Kakwena muntu nànsha umwe udi mmukulondèlecì to. Aci, cìvwa dibuulula dyàkalwà ku Dyulu. Nènku pa lubwebwe elu Nèngiùbakilèpu Èkèleeziyà Wanyì, ne biibi byà ifernò kabyèna mwà kuMutàmba bukolè to.”

⁹⁶ Aci's ki dibuulula menemene dyàkadi Abelè ku cibangidilu. Ndibuulula; divwàku dîbà adi, cìcìdi ànu dibuulula, ne neciikalè misangu yònsò ànu dibuulula. Ncyà bushùwà.

⁹⁷ Mpindyewu, tudì tujandula kaaba aka ne yèyè ùvwa mukàji mpindyewu, ne *mukàji* ùdi ùleeja “èkèleeziyà.” (Ncyà bushùwà anyì? Kilistò ulwalwa bwà cinyì? Mukàji—musèla, mukàji, mushikankùnde virgò.) Ne mukàji mukulumpe ewu, ùvwa ùlaka mukana ùdyàmba mùdiye Èkèleeziyà wa Nzambì; kàdi, cìvwaye, ùvwa mulengeja ne mabanji ne mabwe à mushinga mukolè, ne bikwàbò byònsò, ne ùvwa ne lupànzà lwà bukooya bwà masandi èndè, avwaye mukwacishe naawù bamfùmù bwònsò bàà pa buloba ne mvinyò wawù. Mmwòmò anyì?

⁹⁸ Mpindyewu, tudì tumusangana kaaba aka ne mmubiùkidiiibwe ne “Izàbèlà.” Nènku Izàbèlà, bubi bwàkenza Izàbèlà, pàakakòokeshaye ànu munkaci mwà beena Izàlèèlà apu, wàkabàshipa ne kwenza byònsò bivwàye mwà kwenza abi, ne—ne kwibaka byoshelu byèndè yèyè sungasunga. Mmwòmò anyì? Ki cyòci aci menemene cyàkenzà èkèleeziyà wa Kàtòlikè. Aci's ki cyòci menemene. Kàdi mpindyewu twànjàayibi kutũngunuka ne kubala ndambù. Eci necinùpapùle. Misangu mikwàbò nudi nupanga kukola, nudyàdyakù nupicisha ndambù.

... ùdìbiikila *yèyè mwine mupròfeta*, (Mpindyewu, piikalayè wamba ne: “Mémè ndi mumvwiji wa Dìyì.”) kàdi uyiisha ne *ùseeswisha basadidi banyi bwà kwendabù* masandi, ... *bwà kudyàbu bintu bilàmbula mpingù*.

99 Mwanèètù uvwa mukonke bwà “nyòka awu,” bwà “kudyà cimuma mu budimi bwà Edènà.” Udi umòna cìdici (Kì mmwómò anyì?) pààkambàYe ne: “nudyè,” kaaba aka. Cìvwa ncinyi, cìvwa mu nyumà, nudi numòna’s. Nènku . . . ne . . .

Ki mèmè kumupèèsha cipòòlù bwà kunyingalala bwà masandi—masandi èndè; kàdi kààkanyingalala to.

Mònaayi. Nèmmukùpè mu bulààlù, (Bulààlù bwà mùshindù kaayi? Bwà maalu à bukwapànu. Aci’s ki cìdìye leelù ewu.) ne aba bàdi bende nendè masandi abu mu dikènga dinène, amba ànu bwòbò banyingalale ku byenzedi byàbo. (Aci necibwelè mu Dikènga Dinène.)

Ne . . . nènshébeyè bàna bèndè ne lufù; . . .

100 Hòoolò! Cyèndè cinyi? Ndumbà wa kale ewu ùvwaku ne bàna’s. Mpindyewu Bwàkabuulwibwà 17. Mbanganyi bàà kunùdi . . . ? Nwènu bònsò nuvwa kaaba aka makèèlèlà dilòòlò, ngèèla meeji. Èyo. Bwàkabuulwibwà 17, ndumbà wa kale ewu, èkèleeziyà wa Kàtòlikè, wàkabiiikidiibwa ne “mukàjì wa masandi,” ne yèyè ùvwa “mamwèndè wa bandumà.” Kabàvwa mwà kwikala bàna bàà balùme to, bàvwa maèkèleeziyà.

101 Mpindyewu mpenyi pàvwà èkèleeziyà wa ba-Luthériens, mpenyi pàvwà byònsò ebi bifùmine? Bulongolodi bwònsò ebu mbufùmine penyi? Laòdikiyà awu, mbangilu wendè ùdi penyi? Bwena Nikàlàwù ndekeelu wa byònsò kudifwimbabo mu cyòci aci; aci’s cidi ànu menemene cintu cimwècimwè aci cyàkàbìdi. Kwèna ne cyùdi mwà kwenza to, mwanèètù. Kaa, Èliyà wàkakàndameena cintu aci mu ditùkù dyèndè. Yone wàkacikàndameena mu ditùkù dyèndè. Èyowà’s, mukalenge! Kanùdidìngikù bwà kwela meeji kwamba mu nwènu amu ne: “Tudi ne Abraham bu taatù wetù to: bwalu ndi ngàmbe ne Nzambì ùdi ne bukolè bwà kujuudila Abraham bàna ku mabwe aa.” Nwamònu anyi? Kacyèna ànu mwà kupangila to.

102 Mpindyewu, ùvwa ne bàna. Izàbèlà wa cyà bushùwà awu ùvwa ne bàna anyi? Èyowà’s, mukalenge! Tèèlejàayi:

. . . Nènshébèye bàna bèndè . . .

103 Cinyi? Èkèleeziyà wa Kàtòlikè, bàna bèndè bàdi dingumba dyà Mishòonyi. Nwamònu’s, mmwómò menemene, bwalu bàdi benza cintu cimwècimwè aci. Babàtìijilamù ànu ku dibàtìiiza dyà bulèmà, dibàtìiiza dyà kadiyì mu mifundu to; balabulangana ku cyanza pamutù pàà Nyumà Mwìmpè; “Taatù, Mwànà, ne Nyumà Mwìmpè” pamutù pàà “Yesù Kìlistò.” Kàdi benza ànu bintu byònsò bibèngàngàne ne Bible. Dìbà dyònsò! Nènku bàbwelamù buludi.

104 Mwanèndè wa bakàjì dyèndè ùvwa Athaliah, A-t-h-a-l-i-a-h. Ùvwa ne wendè . . . Yèyè, Izàbèlà, wàkasèlesha Athaliah kùdi Yeholàmà, mwànà wa balùme wa mfùmù wa Yudà, nènku kì nkunenge to byoshelu byà Baalà kwashiibwabi mu Yelusàlèmà.

Mpindyewu, kabyèna bikèngela bwà wèwè kuya ku maalu-malonda bwà aci to, aci's m'Bible. Nwamònu anyi? Mwanèndè wa bakàji, Athaliah, wàkasèdiibwa kùdi mwànà wa balùme wa Yèhoshàfàtá, uvwa Yèholàma. Nènku bânà bèndè bàà bakàji bààkenza cintu cimwècimwè cyàkenzaye aci.

¹⁰⁵ Kaa, ekèlekèle! Kwèna mwà kucimònaku anyi? Nudi numòna mùdi malongolodi awu menze anyi, bânà bèètù? Kwalukidilawù buludi mu Luther ne bakwàbò, ànu menemene, ne kudìvwijabo bulongolodi pamutù pàà kulekelabò Nyumà Mwîmpè. Ne Mpenta wakenza cintu cimwècimwè aci menemene. Kabàvwa ànu mwà kulekela Nyumà Mwîmpè ùtùngunuka ne wenza maalu Wèndè mùshindù, ne kutùngunuka to; ke bukènkè bwònsò bùlwalwà, bùkenkètaayi ànu ku Dìyì, ne tùngunukàayi ne kuya. Kabàvwa mwà kulekela Nyumà Mwîmpè ùlombola to, byàkakèngela bwà kwenzabo bulongolodi kampànda ne kukòsoloka ne bintu bikwàbò byònsò bidì bifwànyine kulonda abi. Kwalukila buludi paanyimà ne kukadisèlesha mu cintu aci cyàkàbidì! Ànu menemene. Patwàfika ku cikondo aci, nutàbaleelè ànu cidì cinwindile mu njila emu. Nwamònu anyi? Baalùkile bakadisèleshemù ànu buludi! Yesù mmwambe apa ne: “Wèndè . . . Izàbèlà ewu, ùdi ùdìbìikila mùdiye ‘mupròfetà,’ kàdi Nèmmukùpe mu bulàalu bwà maalu à bukwapanu, ne kushipa kàbidì bânà bèndè” (Mpindyewu, bà mùshindù kaayi . . .?) “ne lufù.”

¹⁰⁶ Ncinyi . . . ndufù lwà mùshindù kaayi lwikalabo mwà kushipa naalu bânà bèndè? Nudi numòna ne bwòbò mbafwè patùdi twakulangana apa! Bafwè mu nyumà! Kabèèna ne dibuulula nànsha dimwè! Mbamanyè bulongolodi bwàbò, mbamanyè katèshisumù kààbò, mbamanyè dilongesha dyàbò dyà èkèleeziyà; kàdi pakaadibi bikafika ku dimanya dyà Nzambì, bàmwè bàà kùdibo kî mbamanyèPu kantu kutàmba mùdi Hottentot mufwànyine kumanya bwalu bulonda bwà mafùku cinunu ne bùmwe bwà cyena Èjiipitù; ncyà bushùwà, pakaadibi bikafika ku dimanya menemene dyà Nyumà Mwîmpè. Ndi ndikonka; kuCibìikila . . . baswè kubìikila Nyumà wa Nzambì ne “mwena mikendi,” anyi “démon,” wa . . . ku dijingulula dyà nyumà, ne bintu bu nàнку, ne kwipata baadémons. “Mòna’s, yèyè kî ngwa mu bulongolodi bwètù to. Kasùmbù aku, kaa, *brrr*.” Nwamònu’s, kabèna ànu bamanyè to. Ne pashiishe kuCiswikakaja ne—ne dînà dyà “Yesù Nkààyèndè,” anyi mùshindù kampànda wa “munsantu mubùnguluki wa mu malaba,” anyi—anyi cintu kampànda cyà bu nàнку. Kabàyi ànu bamanyè to!

¹⁰⁷ Kàdi dîbà dikaadi pabwìpi dîikala cintu aci ne cyàkwediibwa patòòke. Mmòmò menemene. Nzambì neàcyenze bulelèlà ànu bu mùndi mwimane paanyimà pàà cyambilu apa emu, bwalu Yèyè neàkoke dyàkàmwè bânà Bèndè pambèlu bulelèlà ànu mùndi mwimàne mwab’ewu. Nzambì mu Dyulu

mmumanyè nàнку. Nwènú nwitabuuja ne mémè ndi mupròfeta wa Mukalenge, musadidi wa Mukalenge, nuntèèlejaayi. Ùdi pabwípì menemene. Èyowà's, mukalenge.

108 “Bànà bèndè nebàshipiibwe ku lufù lwà nyumà.” Bâtàngilaayi: bàà mashika ne bàà mmwenekelu wa kwísùkwísù. Tàngilàayi kùdi. . . tàngilàayi wetù. . . Kabyèna bikèngela bwà twètù kwakula bwà ba-Baptistes ne ba-Presbytériens to, tudi bamanyè ne mbafwè kùkaadi bidimu. Cinyi. . .

109 Pààkapetà Luther ditàbuluja dyèndè, dibingishiibwa, bu ne ùvwa mwà. . . Bu yèyè mutùngùnùke, nkwaka munène wa cyena Mpenta ewu—ewu mpindyewu s'ùvwa mufwànyine kwikala èkèleeziyà wa ba-Luthériens. Bukènkè bùvwa bufwànyine kulwila ku dijidiibwa, bwàkalondabu kùdi Wesley abu. Yèyè. . . Luther kàvwa mwà kulonda aci to. To, mukalenge, bakaadi ba-Luthériens.

110 Ki pashìshe Wesley kulwa. Paanyimà pàà Wesley mumanè kufwà, dìbà adi cyàkenzekà ncinyi? Bààkacivwija bulongolodi, ne kwenza ba-Méthodistes bàà cyena Wesley, beena Wes-. . . bàà ku Muji kaa, ba-Méthodistes bàà mìshindù yònsò. Nwamònu anyi? Nènku pàvwà. . . Ùvwa ne ditàbuluja dinène, kàdi pààkadikùpabo mu bulongolodi, cyàkenzeka ncinyi pààkalwà Mpenta wàkula mu myakulu ne ùtwàla dyalujulula dyà mapà? Kabàvwa mwà kunyunga nànsha; kubàbìkilabò ne mbadémons.

111 Mpindyewu cidi Mpenta mwenzè ncinyi? Cintu cìmwècìmwè cyàkenzàbo aci! Kàdi bàdi kwepi? Bafwè ànu bèètù bàà menemene aba. Èyowà's, mukalenge! Ncyà bushùwà. “Nènkupè bânà bèndè mu bulààlù bwà—mu bulààlù bwà lufù, ne kubàshipa.” Èè, lekelaayi—lekelaayi mbale aci bwà nwàcìmònaku mwab'ewu, ngèèla meeji ne cìvwa mvensà wa 22:

*Nènku nèmukupè mu bulààlù, ne aba bàdi bènda
nèndè masandi mu dikènga dinène, (di—Dikènga
Dinène). . .*

112 Ke cidi munkaci mwà kupitakana aci. Mpindyewu vùlukàayi ne, ngǎnji kwimana mwab'ewu ànu bwà katanci kakesè, Dikènga Dinène adi ke dyòdi—dyòdi diikala mwà kumukùpamù, mbantu bàdi virgò mikùtākàne abu bàvwà kabàyi ne maanyi mu myèndù yàbò; kàdi mbàà mu bulongolodi kampànda, bantu bìmpè, baya mu èkèleeziyà, bikwàbò byònsò; kàdi bààkalwa kukeba maanyi, apu ndìbà dimane kuya dipange ne mwà kuya. Nwamònu's, ùmukùpa mu Dikènga Dinène, yèyè neàbwelè mu cyòci aci, èkèleeziyà wa Kàtòlikè ùdi ùbwelamù, bânà bèndè bwònsò bàdi bàbwelamù nèndè, mu Dikènga Dinène.

. . . ànu bwòbò banyingàlèle ku byenzedi byàbò.

113 Kì—kì mbànà bàdimu abu to; kàdi èkèleeziyà yèyè mwinè, abu's mbànà bèndè (ke bulongolodi abu), kì mbantu bàdimu abu to, bu mùdi beena Kàtòlikè bakwàte ne byà luse aba, ba-

Baptistes, ba-Presbytériens, anyi beena Mpenta. Bàdi bàngenza luse be. Anu ne: “Èè, ndi . . .”

“Wèwè udi mwena Kilistò anyi?”

“Èè, mèmè ndi Presbytérien.” Kaa!

114 Aci kacyenaku ne cyàdyenza ne Bwalu abu kutàmba kwamba ne “ngulube udi mwambika kabàsà paanyimà ùvwa kabalù kàà lubilu.” Pa nàнку ncinyi cikwàbò cyùdiku mwà kwenza bwà bwalu abu? Mòna’s, cintu nànsha cìmwè. Ncyèna ngamba aci bwà kunèka to, aci’s. . . eci kî. . . ewu kî mmwaba wà minèku to, eci’s—eci’s ng’Èvànjeeliyò. Nwamònu anyi? Mwua muswè ànu kufila cifwànyikijilu. Nwamònu’s, kàdi aci—aci’s ncyà bushùwà. Nwamònu’s, kabèèna ne—ne cyà dyenza naaCì nànsha cìmwè to.

“Mèmè ndi mwena Mpenta.”

115 Aci kacyéna naaCì bwalu nànsha bùmwè to. Udi mufwànyine kwikala wa mu malongolodi abo awu búngì kabùyi kubala, kàdi udi mwànà mulediibwe cyàkàbìdì wa Nzambi anyi? Cyà bushùwà, udi munange bantu bwònsò ne mwoyi wèbè wònsò, ne musùkà wèbè, ne udi munange Nzambi, ne udi ku ditùkù dyònsò edi. . . nànsha muntu mukwenzele cinyi? Wèwè mukungùle wamba ne: “Humm!” bu scie wa nzembù, bìdi ànu bileeja ne Nyumà Mwîmpè ukaadi muyè, piikalàbi ne uvwa Nendè.

116 Tàngilàayi:

. . . ànu yèyè *munyingàlale ku byenzedi* abi.

Ne mèmè nènshipè bânà bèndè ne lufù; . . .

117 “Bânà bèndè,” bàà Izàbèlè. Mpindyewu, cyàkenza Izàbèlè ncinyi? Kusèleshayè mwanèndè wa bakàjì mu mulongo mukwàbò (wa Yudà) kuntwaku, lwà mu Yudà mwàmwa. Mpindyewu tàngilàayi ngumvwilù wà nyumà. Pàmwàpa ndi mwà kucizola. Mwab’ewu, tàngilàayi eci ne ntèmà menemene mpindyewu:

118 Izàbèlè *nyèyè ewu*, ne Izàlèlèlè. Kàdi Yudà *nyèyè ewu*, ngwa mùshindù mushiilàngàne lwà mwab’ewu, kwaka kùdì mukwàbò; ewu’s n’Yèhoshàfàtà lwà *apa*. Èyo. Mpindyewu, ewu *ewu* ùvwa Aakàbà; mpindyewu Izàbèlè *nyèyè ewu ànu muntwemu*. Mpindyewu, ùdi ubwela *emu* ne ùfikisha Izàlèlèlè mujimà ku dikakuukwila mpìngù.

119 Ki cyòcì aci menemene cyàkenzà èkèleeziyà wa Kàtòlikè kale wàwa mu matùkù èndè pàakasangisha Constantin beena Nikàlàwù (bàà mmwènekele wa mashika wa kwisùkwisù abu *muntwemu*) mu—mu—èkèleeziyà ne mu bumpàngaanù, ne kwenza mmwènekelu wa cimpàngaanù wa bwena Kilistò. Ncyèna muswè kunùtapa ku mwoyi to, nwènù beena Kàtòlikè, kàdi ndi mwambule bujitu kumpàla kwà Nzambi. Ke cyònsò cidì èkèleeziyà wa Kàtòlikè aci, cintu’s mmwènekelu wa

cimpàngaanù wa bwena Kilistò: diitabuuja dyà màjĩmbu, ne mpĩngù, ne bikwàbò byònsò. Aci's ncyà bushùwà menemene, ànu mmwènèkelu wa cimpàngaanù ewu. Mpindyewu, aci's mbulelèlè. Nànsha mémè ne cyà kufwà mu katanci emu, aci's mbulelèlè. Ne beena Mishòònyì bàdi ànu mu cintu cimwècimwè aci, ànu mu cipidi cikwàbò.

¹²⁰ Mpindyewu tàngilàayi nùmonè cyàkenza Izàbèlè. Dìbà adi, nudi numòna's, dya—dyabulù. . . Ûvwa mulekelela bikolè, kwangatayè bânà bèndè bàà bakàjì. Ûvwa ne mwànà wa bakàjì mulelela *apa*, ne mwànà wa bakàjì ewu kuyaye *kuntweku* kùdì muntu wa cijila munène ewu ne kwangata e kusèlanganaye ne mwanèndè wa balùme; ne kutwala cintu cimwècimwè aci *muntwemu* cifùmina kùdì Yèhoshàfàtà, lwà mu citùpà eci.

¹²¹ Mpindyewu, beena Nikàlàwù balelèlè, beena Nikàlàwù, bàà mmwènèkelu wa kwísùkwísù wa mashika bàvwà bajinga bulongolodi abu, bààkasèdiibwa *muntwamu*. Nènku mpindyewu mònaayi cintu cimwècimwè aci. Bààkangata Izàbèlè *kaaba aka* (èkèleeziyà wa Kàtòlikè), nènku lwà kwĩnshi *eku* kwangataye mwanèndè wa bakàjì (malongolodi èndè) ne kuàsèleshila ànu mu bwòbò abu kuntwaku, ne kubènzela cintu cimwècimwè aci. “Kumushebeela bânà bèndè balela ne lufù,” lufù lwà nyumà. Badyenze bulongolodi ne ku lufù, kàdi katanci aka anyì, Nyumà yònsò mùmbe muye.

¹²² Ngambilaayaaku. Lekelaayi nnukonkeku cintu cimwèpelè, mulongi kanà yònsò wa maalu-malonda udi mwab'ewu, mùndì mumanye nudi bàtaanu anyì bàsambòmbò bajimà basòmbè mwab'ewu. Ndi muswè bwà nwènù kulwa kundeejaku Mufùndu ùmwèpelè anyì—anyì bwalu bufùndà bwà—bwà mu maalu-malonda, bwà ne ng'èkèleeziyà kaayi ku yònsò yikaadiku midishinde ne myalukile mu bulongolodi ukàadiku mujuuke kàbìdì ne ditàbuluja. Ngambilaayaaku. Pàdìyi ànu ne yàdìvwijì bulongolodi, yikaatuku kacya mipete ditàbuluja paanyimà pàà yòyi mimanè kudìvwija bulongolodi anyì? To, mukalenge! Nyumà wàkabashiya. Ndi mbadilamu ne Mpenta.

¹²³ Pààkaponu Mabènesha à Mpenta, ke nwènù bwònsò kwakula mu myakulu, nwènù beena kale, nwàkapeta Mabènesha manène à Mpenta awu ne bikwàbò, pààkaponawu. Paanyimà pàà cipòòlù kampànda nwènù kwenza cinwàkiinyika ne Nsangilu Munène. Ndongolwelu's mmwìmpè, kàdi kí mbulongolodi to. Cyà kumpàla, kanùvwa mwà kubùtwàla to, bivwa bikèngela bwà nwènù kwalukila buludì ne kulwa “mwànà wa . . . Sàtaanà,” ne kudìvwija bulongolodi.

¹²⁴ Ne pashìshe Bukènkè bukwàbò kulwabo, bwà Dìnà dyà Yesù Kilistò. Dìbà adi kushààlabo bwònsò beena madìleeji bàmba ne: “Nzambì àbèneshiibwè, wèwè kùyì ne dìnà dyà Yesù to, uyààya mu ifernò. Nènku twètù tudi naaDì, kàdi nwènù kanwèna naaDì to.” Cyàkenzàbo ncinyì? Kufwilabo ànu

muntwamu mu njila yàbò ayi; kucivwija bulongolodi. Nwamònu anyi? Pamutù pàà kulekela Bukênkè ànu butùnkumuka mu èkèleeziyà, bìvwa mwà kudyàngacila kaaba kààbù. Kàdi nwènu nudi nudivwija bulongolodi. Ncinyi aci? Mwànà wa Izàbèlà. Ne bwònsò bàakafwà, pàmwè.

¹²⁵ Mpindyewu ndi muswè kunukonkaku cintu kampànda. Beena Assemblées de Dieu, anyi ba-Unitaires, anyi—anyi ní nganyì wa ku bakwàbò bàkaadikù bajuuke mu ditabuluja dinène disanga anyi? Nànsha kakesè! Ditàbuluja dyà ndekeelu didi difuma ku dipita edi, dyà pààkapweka Nyumà Mwímpè ku musulù kwaka (bààbùngi bàà kunùdi bàdi basòmbe kaaba aka mpindyewu mene) mu cidimu cyà 1933, ne mudimu munène wa dyondopa ewu wùvwa ne cyà kwenzeka, kwamba ne: “Neditwe eku ne eku kwà buloba,” ne kadyàkalwila mu bulongolodi bukwàbò nànsha bùmwè to. Nzambi wàkaya pambèlù pàà bipaapu abi ne kujuula mumpàngaanù, bu nànkù’s, bwà kukùtula ditàbuluja adi. Kàdi tàngilàayi cidiDi dyenze’s! Nwamònu anyi?

¹²⁶ Malongolodi awu, pàdìwù ànu àdilongolola, àdi àfwa. Yèyè ne: “Nénshebèyè bânà bèndè ne lufù.” Kaa, ekèlekèle! Ndi mumanyè ne wèwè. . . Bu nwènu mwà kuswà kanùngumvwidiku bibi to, kàdi ndi. . . Mémè mumanye Eci kàdi nciyi ncyàmba to, ndi mwena lubombo wetù wa ciipanshi, ne Nzambi neàmbadile Bwalu ebu. Ndi muswè kwikala bu Pòlò ne: “Ncyèna mwepùke bwà kunwambila patòòke mubelu wònsò wà Nzambi nànsha.” Ncyà bushùwà. Èyo. Èyo.

¹²⁷ Mpindyewu, ne bààkiibaka byoshelu mu Yelusàlèmà. Mpindyewu ndi muswè kumòna. . . Nènku pààkasèdiibwa Izàbèlà kùdi Aakabà, wàkalwa ne mpingu bwà Izàlèèlà kuponaku mikookwela. Ki mwàkenza dilongesha dyà beena Nikàlàwù, kusèlangana ne bampàngaanù; kuumusha Jupiter, kuzànjika Peetèlò; ne Venus, kwaluja Màriyà; nènku bu mwàkamba Bible ne: “Wàkafikisha Izàlèèlà mujimà ku dyenza dyà mpèkaatù.”

¹²⁸ Ki mùdi èkèleeziyà wa Kàtòlikè mufikishe mishikankunde yònsò bwà kusèdiibwa mu bulongolodi, kàdi cintu cyònsò nkòòng cidi mpèkaatù, bu mwàkenzela Izàbèlà mushikankunde wèndè. Èyo. Ne mu kwenza nùnkù pààkatèèkabu balombodi bàà myanzu abu, ke Paapà Boniface—Boniface III kwangata nkwasà, nènku bàvwa ne—ne kaanzambi pa nkwasà wa butùmbi, kabàcivwa kàbìdi bwalu ne dibàtiiza dyà Nyumà Mwímpè mu èkèleeziyà nànsha. Ncyà bushùwà. Bàkaavwa ne twitabaayi yàbò ne mmwènekèlu yà kwìsukwìsù, ne bàya batùngùnuke.

¹²⁹ Nènku pààkiitaba bulongolodi mèyi maswika àmwèàmwè awu, kupàtulabo budìikadidi bwà Nyumà Mwímpè mu èkèleeziyà, Ba-Baptistes, ba-Presbytériens, ba-Méthodistes, ne bakwàbò. Ncyàkenzabo bushùwà! Nènku ku kakesè ku

kakesè tudi tubàmòna munkaci mwà kufùbidila ne kufwà ànu mwàkamba Yesù bwà mvinyò amu. Mpindyewu, byònsò byà Nyumà Mwîmpè mu bimanyinu ne maalu à kukema byàkateekiibwa mu matùkù àkaavwà mamana kupita. Nènku ke kushàalabo babanji, mwàkenza mukàji awu amu. Ki kufikishaye buloba bujimà ku dyanza dyà mpèkaatù, bwalu wàkaya ku ditùnga ne ditùnga dyònsò, yêyè ne mishikankùndè yèndè. Ncyà bushùwà.

¹³⁰ Mpindyewu tàngilàayi mùdiYe ùmubiikila mu cikondo cikwàbò cyà èkèleeziyà mpindyewu. Tàngilàayi mùdiYe ùmubiikila. Tàngilàayi mùdiYe ùsengeleela kaaba aka ku ndekeulu, ne ùpatula Bashàadile Bèndè ne: “bwà bwalu bwà Basungula,” ànu ndambù, bwà ne musunya nànsha ùmwè kawùvwa mwà kusùngidiibwa to bu . . . kî mbakwàbò nànsha.

¹³¹ Bu mùdìbi bifùndiibwe mu Bwàkabuulwibwà 13:6. Nudi baswè kufikaku ànu mu katanci emu anyi? MwàkambàYè ne Yèyè . . . ne “Mukàji ewu wàkafikisha bwònsò ku dipeta cimanyishilu (nyama wa lwonji ewu), wàkafikisha bwònsò ku dipeta cimanyishilu (bwònsò bapèlè, banène, cyònsò ciwàbò aci), cimanyishilu cyà nyama wa lwonji,” ùvwa ng’Èkèleeziyà wa Kàtòlikè wa cyena Loomò.

¹³² Anyi aci anyi bàakenza cimfwànyì . . . Bwàkabuulwibwà 13:14, bàakenza cimfwànyì cyà nyama wa lwonji. Nudi—nudi . . . Ndi ngèèla meeji ne nwènù bwònsò nudi nubala cyòci aci. Nwènù kanùyì nucibalè to, mòna’s, netùbuululepu bwà kucibala. Bwàkabuulwibwà 13:14:

Nènku yêyè kuseeswisha aba bàdi basòmbèle pa buloba ku bishima abi bìvwaye mupetele bukolè bwà kwenza mwisù mwà nyama wa lwonji; (Ki nsangilu wa èkèleeziyà nyêyè ewu.) . . . ne kwenza ku mèsù kwà nyama wa lwonji; wàmbila aba bàvwa basòmbèle pa buloba, bwà bààmòna mwà kwenzela nyama wa lwonji ewu cimfwànyì, ewu uvwa ne mpùtá wa lufù awu (cimpàngaanù) . . . ne ùvwa wa ku mwelè wà mvità, kàdi ùvwa ne mwoyi . . . (ku bukalenge bwà paapà, Loomò wa cimpàngaanù uya ku Loomò wa ciipaapà. Nwamònu anyi?)

¹³³ “Kumwenzela cimfwànyì.” Ncifwànyìne kwikala cinyi? Ànu cidibo munkaci mwà kwenza mpindyewu mene, ànu menemene, bavùkùte lubilu bàkabwela mu nsangilu wa maèkèleeziyà, “Èkèleeziyà yònsò yikashààla yà mu bulongolodi ebu, yònsò yikabwela mu cisùmbù cimwèpelè.” Patùdi twakulangana apa bàdi munkaci mwà kwenza Bible. Nènku Paapà Jean mmubàbìikidìshe bwònsò. Mwèpiskòpò mutàm̀bidìle wa Canterbury, bwònsò bàyaayakù. Katanci aka anyi, cintu cyònsò nkòong cidi cyàlukila kùdi *Maman*, bwalu bwòbò biinè ndumba ànu yà kacya kwònsò eku. Nwamònu anyi? Bàdi bàm̀ba ne:

“Netùdiswike bwónsò cyàpàmwè bwà kiipàcilà kàmwèpelè kanène bwà kulwisha Communisme.” Kàdi kabàyi bamanyè ne Nzambì mmujùle Communisme (Ndi mwà kujaadika aci ku Bible ewu.) ne mmutèèke mene mu meeji àbò bwà kusombwelabo bansantu, bwà mashi àkeelabo panshì pa buloba. Nzambì wàkalongolola Communisme ànu mùshindù ùmwèùmwe wàkenzàYe ne Mfùmù Nebùkendènèesa bwà—bwà kunyooka Izàlèèlà awu. Wàkajuula communisme, ne òmwè ditùkù yéyè neàjìmiyè Loomò mu kartà. [Katùpà kàà mukàbà wa méyi munda mutupù—Muf.] Aci’s ncyòci menemene. Nzambì ngudi mwambe nànkù. Ncyà bushùwà.

Mémè ntu mbengangana ne communisme; ùdi ùlwisha Nzambì. Ke cidìye bushùwà. Kàdi kanùtambi kutùma ntèmà bikolè ku Rìdò wa Cyamu to, kàdi tabaleelàayi rìdò mukùnzùbile. Balàayi *Mukàndà wa Bafwile Diitaba* wà Foxe nènku nenùmòne eci, ncyà bushùwà.

¹³⁴ Mpindyewu tumònàayiibi mwaba utùdi. . . Nènku pashìishe nudi numòna kaaba aka mpindyewu ne mukàji ewu wàkafikisha bwónsò (babanji ne bapèlè) ku dipeta cimanyishilu; kàdi kùdi kasumbù kàmwèpelè kavwàye kàyi mwà kulenga to. Nudi bamanye aci anyi? Bwàkabuulwibwà 13: . . . 8.

¹³⁵ Tèèlejàayi eci. Ngànji kubala eci:

Ki mémè kwimana pa lusenga lwà mbù, ne kumòna nyama ùjuukila mu mbù, mwikale ne mitù mwandamutekète ne nsèngù dikumi, . . . pa nsèngù ayi. . . bifulu byà butùmbi, ne pa mitù ayi dìnà dyà bipendu. (Aci’s ki tukùnà mwandamutekète; tuvwa bacyàngate cyònsò dilòlò dishàale edi, s’nudi bamanyè.)

Nènku nyama ùdi wèwè mumòne ùvwa mufwànàngàne ne nkàshàmà, . . . makàsà bu—bu ours, ne mukana mwèndè. . . mukana mwà ntambwe: ne dragon awu (Uvwa démon mukunze uvwa mwimàne kumpàla kwà mukàji bwà kudyà mwanèndè awu, uvwa n’Loomò, tudi bwónsò bamanyè aci.) . . . ne *wàkamupèèsha. . . bukolè, ne nkwasà wèndè, ne bukòòkeshi bunène.*

Ki mémè kumòna ùmwè wà ku mitù yèndè ayi mwenze bu uvwa mutapa mpùtá wa lufù; (cimpàngaanù, nwamònu’s) *kàdi mpùtá wèndè wa lufù awu wàkondopiibwa:* (buupaapà kwangata kaaba kèndè, kudiswikakaja ne bwena Kilstò, ne bwena Nikàlàwù) *ne buloba bwónsò bwàkàkacila nyama awu.*

¹³⁶ Cyena Kàtòlikè neitangàlake mu ditùnga ne ditùnga dyònsò mwinshì mwà mau. Ncyà bushùwà. Ànu mwàkamba Danyèlè bwà cyamu cifiike cibwelakana ne díma, ne bikwàbò.

137 Kàdi nenùmpèèshe kantu kakesè pa bwalu abu, kàà ne “cyamu cifiike ne dîma.” Nukààdikù bamòne, anyi nkààdikù kacya munùtèèlèlecì, mu cisangilu cinène cyà muyiiki cyà musangu mushààle cyàkenzàbo kwàka kùvwa Khrushchev mukopòle cisàbaata cyèndè ne mucituute pa mèèsà anyi? Kùvwa matùnga àtaanu à ku esètè àvwà madisangishe kuntwaku, kùvwa matùnga àtaanu à ku wesètè. Khrushchev ùvwa mwimànyine matùnga à ku esètè, Eisenhower ùvwa mwimànyine matùnga à ku wesètè; s’ki balombodi bàbìdì banène abu, bàna bàà nkàsà bàbìdì banène abu. *Khrushchev*, mu Russie, mbwena kwamba ne “dîma.” *Eisenhower*, mu Àmèr- . . . mu Anglais, mbwena kwamba ne “cyamu cifiike.” Tukààdi ku ndekeelu.

Ne bààkakuukwila dragon wàkapèèsha nyama wa lwonji bukolè awu: ne . . . (Ki diyiiisha dyètù didì dilonda ku tabernacle, nudi numvwa.) . . . ne kukuukwilabò nyama wa lwonji awu, bàmba ne: Nganyi udi mufwànàngàne ne nyama wa lwonji? ne nganyi udi mukùmbàne mwà kwenza nendè mvità?

138 Mu ngaakwilù mukwàbò, tàngilàayi apa. Eisenhower ùdi ne—ùdi ne dîna dinène muneemu mu États-Unis emu, kàdi mu Loomò yèyè kèna ncintu nànsha cìmwè to; mu Russie, yèyè kèna cintu nànsha cìmwè to. Khrushchev ùdi munène mu Russie, kàdi mu États-Unis yèyè kèna cintu nànsha cìmwè. Kàdi kùdì muntu umwèpelè udi munène myaba yònsò, udi paapà awu (Ncya bushùwà.) “Tùdilongòlolaayi pàmwè, ne tudisangàayi.”

Nenku bààkamupèèsha mukana bwà kwakula maalu manène . . . bipendu; . . . bààkamupèèsha bukolè bwà kutùngunuka munda mwà ngondo makumi ànaayi ne yìbìdì.

Nenku kukangulaye mukana mwèndè ne kupenda Nzambì, (ne “balongesha mèyì matùmà à bantu bu dilongesha; beena mitù mikolè, badibàndishi, banangi bàà bisànkasanka; biikàle ne cìmwènekelu cyà difwàna dyà Nzambì, bavila Bukolè bwàdì”) . . . ne kupenda dîna dyèndè, (Wàkangata “Taatu, Mwànà, ne Nyumà Mwimpè” pamutù pàà “Mukalenge Yesù Kilistò.” Nwamònu anyi?) ne ntentà wèndè, ne aba bààkasòmbela mu . . . mu—mu dyulu.

Ne bààkamupèèsha bwà kulwanganyisha bansantu, (ke dikengeshiibwa kujjuuka) ne bwà kubàcìmuna: ne bààkamupèèsha bukolè kumutù kwà bifuku byònsò, . . . myakulu, ne matùnga.

Ne bwònsò bàdì basòmbèle pa buloba—buloba nebàmukuukwilè, beena mènà avwa kaayi mafunda mu mukàndà wa mwoyi wa Mwànà wa mùkòòkò mushipa kacya ku difùkà dyà dyulu ne buloba. (Kaa, kaa, kaa, kaa, kaa, kaa, kaa, kaa.)

139 “Difùkà dyà buloba.” Mènà ètù, bu ne àdikù mu Mukàndà awu, àkafundiibwa kale wàwa. Yesù wàkamba ne: “Muntu nànsha umwe kèna mwà kulwa kùNdi pàdi Taatù Wanyì kàyì mumukòke dyàmbedi to, ne bònsò *bàdi* Taatù muMpèeshe nebàlwe kùNdi. Mikòòkò Yànyì yidi yùmvwa Dìyì Dyànyì,” (Eci ki Cyàkudyà, nwamònu’s.) “ne mwenyi. . .”

140 Pashìishe ùdi mwà kwamba ne: “Èè, mèmè ndi ànu mukashàale wa mu èkèleeziyà, ndi ànu mwìmpè mùdi amu.” Aci kí nCyàkudyà cyà mìkòòkò nànsha.

141 Cyàkudyà cyà mìkòòkò *ncyòci eci*: “Basòmbe pàmwè mu myaba yà mu Dyulu mu Kilistò.” Kaa, Yèyè’s mmulenga be! Ki mmwòmò anyi? Èyo.

142 Mpindyewu tujikijàayi lùkasà menemene bwalu cidi, èyowà, mpindyewu dibà dikaadi dipite. Èyo. “Kàdi ndi ngàmba. . .” Twànjibi kumòna mpindyewu, ndi ne mvensà wa 23:

Ne mèmè nènshipè bânà bèndè ne lufù; ne èkèleeziyà yònsò neyìmanyè ne ndi ewu udi ukenketa toonyi ne myoyi: ne nèmpe muntu ne muntu wa kunùdi bilondèshìle byenzedi byèndè.

Kàdi ndi nwwambila nwènù, ne bakwàbò bàà mu Twatilà, mu búngì bwònsò bùdi kabùyì ne dilongesha edi, . . . (Dìywa ndilongesha kaayi? Bulongolodi, bèèpiskòpò, ne bèèpiskòpò batàmbidile, ne baapaapà, nwamònu’s.)

143 “Udi kàyì ne dilongesha edi to.” Mpindyewu, mu Bible, tudi bajandùle makèèlèlà dilòòlò awu ne Izàlèèlà, pàvwàye ùpicila mu Moàbà, kabàvwà ditungà to. Bàvwà basòmbèle paanshì pàà buloba, ne bàvwà cisàmbà, badiikàdile. Mmwòmò anyi? Cimfwànyì; balalakanyi, mu ntèntà ne bikwàbò. Misumbà yà beena mpenta yidi mùshindù ùmwèùmwè awu, mpenta mulelèlà, bàlálakana ku mwaba ne mukwàbò. Nwamònu anyi? Èyo.

. . . ne kabàyì ne dilongesha edi to (kàdi badìvwije bulongolodi, ne bacìvwije bulongolodi) . . . bàdi kabàyì ne eci. . . ne bàdi kabàyì bamanyè ndòndò yà Sàtaanà to, . . .

144 Mpindyewu vùlukàayi ne tudi basangàne mwaba wùvwà nkwasà wa Sàtaanà ùsanganyiibwa. Dilòòlò dishàale tuvwa bàalukile nendè buludi too ne ku cibangidilu. Nkwasa wendè ùvwa penyì ku cibangidilu? Mu Baabùlòonà. Ne Baabùlòonà. . . Pàdi—balombodi bàà myânzù, mwakwidi mfùmù wa Baabùlòonà, uvwabo benda balumbatangana nendè kùdi bacimunyi bàà beena Kaasadà, wàkalwa ku Peegàmò ne kushikikakù nkwasà wendè. Nwamònu’s, kutentemuna nkwasà wendè ku Shineàlà kuya nendè ne ku Peegàmò. Twafùmu ku dibala cyòci aci ànu mu maalu-malonda makèèlèlà dilòòlò awu. Ne mpindyewu ki yèyè awu ùbangakù, kwenza èkèleeziyà wa

Kàtòlikè, ucìdi ànu mamwèndè wa Baabùlòònà. Èyo: “Nkwasa wa Sàtaanà.”

...ne nkwasa wa Sàtaanà, pàdìbo bààkula;
ncyakunwambika bujitu nànsha bùmwe pambidi
 to.

¹⁴⁵ “Kakwàkwikala kàbìdì bujitu to; ànu bunukaadi naabù abu.” Bashààdile bakesè aba bàdì kaaba aka, nwamònu’s, bàdì bwònsò bayobèshìibwe mu Cikondo cyà Mìdimà eci. Mpindyewu kukaadi bidimu biipàcìle ku cinunu ne nkàmà yìtaanu byàkapìcilabo mu cyòcì aci.

Kàdì eci cinùkaadi naaci shààlaayi bacìkwate ndendende too ne pangàalwa. (Mu ngaakwilù mukwàbò ne: “Nucìdì ànu ne Dibènesha dyà Mpenta mu myoyi yènù. Shààlaayi bacìkwate too ne pangàalwa kunupèesha diikisha, bwalu cikondo cìdì cilonda eci cilwalwa mu dîbà dîdì dilonda.”)

...ewu wàcimuna, ne wàlamina mèyi àanyi too
 ne ku ndekeelu, kùdìye nemmupèèshe bukòòkeshi pa
 matùnga:

Nènku yéyè neàbàlombole ne dikombo dyà cyamu cífike; nènku ànu mùdì dibùngù dyà mujwìmbi ke mwavingutudiibwàbo tupesetupese: mândi mucipetele kùdì Taatù wanyi.

¹⁴⁶ Nudi numòna’s, Èkèleeziyà awu, nebìikalè cinyi pìikalà Cikondo cyà Èkèleeziyà cyà Mìdimà aci cijooke bwà kwimana ku cilumbulwidì bwà kupiisha musumbà wà cimpàngaanù wà... kuntwaku? Nebàbàdyatakàjè ku makàsà! Makàsà à cyàmù cyà kabanda awu neàcìdyatakaje ànu muntwamu, ndi nkwambila’s! “Yèyè neàbavingùtùle mu tusùnsukila,” mwàmbambà Bible.

Ne mèmè nèmupèèshè mùtootò wa mu dindà. (Nudi bamanyè cìdì aci’s, kì mmwòmò anyi? *Kilistò* ke “Mùtootò wà mu Dindà.” Èyo.)

Ewu udi ne macì, úmwè cìdì Nyumà wàmbila maèkèleeziyà.

¹⁴⁷ Kaa, ekèlekè! Kanwènaku ne disànkà anyi’s! Dìbà dikaadi dipiteku ndambù. Ndi ne mukwàbò kàbìdì, nèngwangàte pàmwàpa màalabà dilòòlò, pa eci cyà bidimu binunu bibìdì abi.

Kàdì Yèyè ùdì Mbata wa mu Cibanda, Mùtootò
 wà Nkèesha wà mu Dindà,

Yèyè mmwìmpè mutàmbe binunu dikumi bwà
 musùùkà wanyi.

Mbata wa mu Cibanda, mu Yèyè nkààyendè ndi
 mmòna,

Cyònsò cìndì njinga...ne unkumbaje mèmè
 yònsò.

Mu dibungama Yèyè ke bwànyì busàmbì, mu
 lutàtù Yèyè ke cyeyemenu cyànyì,
 Mungambile bwà mMwimikile lutàtù lwànyì
 lwònsò.
 Àlèluuyàh!
 Yèyè ke Mbata wa mu Cibanda, Mùtootò wà
 Nkèèsha wà mu Dìndà,
 Yèyè's mmwìmpè mutàmbe binunu dikumi
 bwà musùùkà wànyì.

148 Nudi baMunangè anyì? Kaa, mèmè ndi ànu:
 Ndi muMunange, ndi. . .

Mpindyewu tuMukuukwilaayi mpindyewu, Mèyì wònsò à
 àtapa awu ne Mukenji.

Bwalu Yèyè wakannanga kumpàla
 Ne wàkampetela lupàndu
 Ku mucì wà Kàlvariyò.

149 Yèyè kènapù mulenga anyì's! Ndi muMunange. Mpindyewu,
 bintu bìndi mupangìle kufikakù abi, nebìikalè mu mikàndà, mu
 bushùwà bwà bwalu, bwalu katwèna mwà kutwàla cikondo cyà
 èkèleeziyà cyònsò mu dilòlò dimwèpelè nànsha. Ndi mwenze bu
 mucyàkule bitùùlù ndambù dilòlò edi, mbwalu díyì ndipàtekù
 ndambù. Kàdi, kaa, Yèyè kì mmulenga wa dikèma anyì's! Kaa!
 Hmm!

Kùdi bantu pàmwè ne myaba yònsò,
 Beena myoyi yìdì yilàkuka
 Ne Kapyà kààkapònà dyà Mpenta,
 Kààkabàkezulà ne kubàvwija bakezùke aku;
 Kaa, Kàdi kwòsha mpindyewu munda mwà
 mwoyi wànyì,
 Kaa, butùmbì kùdì Dìnà Dyèndè!
 Ndi ne disànkà dyàbùngì mùndì mwà kwamba
 ne ndi umwe wabò.
 Kaa, umwe wabò, ndi umwe wabò,
 Ndi ne disànkà dyàbùngì mùndì mwà kwamba
 ne ndi umwe wabò, (Àlèluuyàh!)
 Umwe wabò, umwe wabò,
 Ndi ne disànkà dyàbùngì mùndì mwà kwamba
 ne ndi umwe wabò.

150 Nudi ne disànkà anyì? Ndi mvùluka dilòlò kampànda
 mfùmìna ku Chattanooga kwaka; kàdi ndèkè kutùùluka ku—
 ku—ku Tennessee, lwà ku Memphis kwàka. Kuntèèkabò ku
 cilààlabenyi cinène, ne cilenga aci. Ki kumbìikilabo, kwamba
 ne: “Ndèkè neàtuukè pa—pa díbà mwandamutekète jaajaaja, mu
 dìndà dyàlondà.”

151 Nèngu mvwà nya ne mikàndà yà kwela ku poste; pàmvwà
 ngààlukila kumbèlu, mufunde bwà kwandamuna bàmwè bàà

ku balunda bàanyi. Nènku mu dipweka amu, Nyumà Mwímpè kwambayè ne: “Tùngunuka ne kwenda.” Mémè kutùngunuka, kupweka too ne mu citùpà cyà buloba cyà bafiike.

¹⁵² Mvwa mwimàne mwaba awu, mémè kudyàmbidila ne: “Èkèlekèle! Mòna umòne’s, díbà dyákànyì dyà ndèkè awu kuyayè.”

¹⁵³ Ki Nyumà Mwímpè kutùngunuka ne kwamba ne: “Tùngunukà ne kwenda.” Ànu mwàkenzàYe mu diitu ditùkù adi kuntu kwaka, nudi bamanyè’s. “Tùngunukà wèwè anu ne kwenda.” Ki mémè kutùngunuka ne kwenda kuya.

¹⁵⁴ Kwenzekabi ne ngèlè mèsù lwà kwinshì aku, mu kàmwè kàà ku tuzùbù twà tubutabuta twà bafiike atu mùvwa bantu bàà bafiike basòmbèle, bapèlè, kwinshì aku. Ki Maamù mukulumpe Jemima, ànu bu nàнку, mwikale ne mutèèlù wà kansongààlùme mujìngila ku mutù kwèndè, mweyèmène lwà ku. . .mùshindù awu.

¹⁵⁵ Nènku mvwà ngènda mpweka ngimba musambu:

Ndi. . . wabò, ndi umwe wabò,
Ndi ne disànkà dyàbùngì mùndì mwà kwamba
ne ndi umwe wabò, (Kaa, Àlèluuyàh!)

“Kàdi ncinyì cyŪdi ukeba, Mukalenge?”

Umwe wabò, ndi umwe wabò,

Nudi nwitabuuja mu dilombodiibwa dyà kùdì Nyumà anyì? Èyowà’s, cyà bushùwà.

Ndi ne disànkà dyàbùngì mùndì mwà kwamba
ne ndi umwe wabò.

¹⁵⁶ Kùkaadi bidimu bitwè ku dikùmi ne binaayi mpindyewu. Ūvwa mutàngidile pamutù pàà lupangu alu apu. Mvwa nsanganyibwa bu, kaa, mu ntàntà wa nkacinkaci wa misèsù yibìdì kule nendè, ki mémè kumòna inàbànzà mùshindàme, wa bafiike munkaci mwà kumbandisha kumpwekesha, nudi bamanyè’s. Èè, mémè kutùngunuka, kulekela kwimba musambu, kutwàdija kwenda mpweka. Ndi mwenze ànu mfika pabwìpì nendè, mwikale ne binsonji bipùmukila pa matàma manène à bijèngu awu; kuntàngilaye, wamba ne: “Wetwàwu, Mpaasàtà!”

¹⁵⁷ Mémè kukenzakana, kwamba ne: “Wetwàwu, Mwabàna?” Ki yèyè ne. . .mémè kukenzakana, ki yèyè munkaci mwà kuseka, mwikale ne mimwemwe minène kwìsù. Mémè ne: “Mmunyì mùdì mumanyè ne mvwa mpaasàtà?” Ku Sud kwàka, s’nudi bamanyè, *muyishi* ùdì “mpaasàtà.” Mémè ne. . .Mémè ne: “Mmunyì mùdikù mufwànyìne kumanya ne mémè mvwa mpaasàtà?”

Yèyè ne: “Mvwa mumanyè ne wèwè uvwa ulwa!”

Ki mémè ne: “Udì mumanyè nàнку bishì? Udì mumanyè anyì?”

Yèyè ne: “To, mukalenge.” Ki yèyè ne: “Ndi mumanyè ne wèwè uvwa ulwa.” Yèyè ne: “Kacya ukààdikù muumvwe bwalubulonda bwà mukàjì mwena Suunèma anyi?”

Mémè ne: “Èyowà’s, mukalenge.”

158 Ki yèyè ne: “Èè,” yèyè ne, “mémè’s mvwa mukàjì wa mùshindù awu.” Yèyè ne: “Ki Mukalenge kumpèèsha mwànà wa mu dibòko, ki mémè kumwambila... kuMwambila ne Mémè nèmmukolèshè.” Yèyè ne: “Ndi mukàjì mupèlè. Ntu ngenza mudimu wà disukwila batòoke bilàmbà bwà kupeta cyakudya.” Yèyè ne: “Ke Yèyè kungambila ne Yèyè—Yèyè neàmpèèshe mwànà, ne mémè kuMwambila ne nèmmukolèshè.” Yèyè ne: “Mémè kumukolesha ne mwànyì pàànyì mwònsò mùmwà munganyè, kàdì” mwàkambàye, “Mpaasàtà wa yààya, mmukadisangàne munkaci mwà balunda babi. Mmupetakane ne disaamà, kàdì twètù katwèna bamanyè kantu nànsha kàmwè pa bwalu abu to.” Yèyè ne: “Ùdi naadi dimunekè. Patùdì twakula apa ùdi ùpunga ne lufù, mu nzùbu mwàmwa pa bulààlu.” Yèyè ne: “Kacyèna kàbidì mu yèyè to mpindyewu, kukaadi matùkù àbidì.” Yèyè ne: “Ngàngàbuka mmulwe mwambe ne: ‘Dikaadi didyè mwoyi wèndè ne bikwàbò, ndibwele too ne mu tujilu twà mashi, bibi bikolè mu mùshindù wà ne ndimucibwile ne panshi; mu mùshindù wà ne bintu bìdìbo bàmpèèsha kí mbifwànyine kumukwacisha mpindyewu to.’” Ki yèyè ne: “Ùdi ùpunga ne lufù.” Ki yèyè ne: “Ncyèna ànu mwà kutwàla bwà kumumòna ùfwa, ngènzàmpèkààtù to.” Ki yèyè ne: “Mémè kusambila ne kusambila,” yèyè ne, “bufùku bujimà mémè kusambila.” Yèyè ne: “Yèyè kèna mu yèyè to, kèna mumanyè cintu nànsha cimwè to.” Yèyè ne: “Kèna ùdipeta to kùkaadi matùkù àbidì.”

159 Yèyè ne: “Mvwa musambile, mwàmbe ne: ‘Mukalenge, Wèwè’s ngudi mumpè mwàna awu’ ne kwambaye, ‘bu muWàkenzela mukàjì mwena Suunèma.’ Yèyè ne: ‘Eliyà Webè awu ùdi penyì? Mpenyì pàdì. . .?’ Yèyè ne: ‘Èè, nkwepi—nkwepi kùdikù cintu kampàndà bwà kunkwàcisha?’”

160 Ki yèyè ne: “Mémè kupona mu tulù ànu ku binù kùmvwà aku.” Ke yèyè ne: “Mukalenge kwakulangana naanyì, mu cilòòtà cyànyì,” ke yèyè ne, “Patukà pambèlù wimanyinè ku ciibi. Nènkù nekùlwe muntu mulùme wènda ùpweka ne mùsèèsù, mwase kaacifulu kakesè, kàà lutanda kafìkùlùke mwikale ne nkooici mufiike.’ KwambaYè ne: ‘Yèyè neàkulè neebè.’”

161 Ke kwambaye ne: “Ndi mwimane mwab’ewu kacya ànu kumpàla kwà panshi kutòoka.” Ne nyimà wèndè ùvwa mubole bolàà ne lumuma. Ki kwambaye ne: “Ki mémè kukumòna ulwa ne cifulu cyà lutanda cifìkùlùke aci,” yèyè ne, “kàdì uvwa ne cyà kwikala mwambule kaacibuta kakesè.”

162 Mémè ne: “Ndi mucishiyè mu cilààla-beenyi.” Nwamònu anyi? Ki mémè ne: “Mwanèèbè wa balùme ùdi ùsaama anyi?”

Yèyè ne: “Ùdi ùpunga ne lufù.”

Mémè ne: “Dínà dyànyì m’Branham.” Mémè ne: “Udi mummanyè anyi?”

Yèyè ne: “To, mukalenge, Mpaasàtà Branham, kacya ncitukù—ncitukù mwanjì kuumvwaku bàkutèèla to.”

Mémè ne: “Ntu nsambidila babèèdi.” Abi kabivwa bimwambila bwalu to. Kàvwa muswè bwà mwanèndè wa balùme kufwàye, ngènzàmpèkààtù to.

¹⁶³ Mémè kubwela mu nzùbu; bàvwa ne ciibi cyà kale mwaba awu ciikalè ne cyamù cyà ku lukasù lwà ngombe cilembejakù bwà kwikalaci cidikànga (pàmwàpa bààbùngì bàà ku nwènu beena ku Nord kanwèna bafwànyine kumanya ne ncinyi to), kàdi, mbwà kushààla balame ciibi cikànga. Ki mémè kubwela mu nzùbu amu, mu kazùbu kakesè, kanci, kàà kale, kàà tuubibambalu tùbìdì (kafwànàngàne ne kakesè. . .katùtù tubiikila ne “kazùbu kàà disòmù kakesè”) bu nànkù awu, kiimàne mwaba awu; kùdi cibambalu *mwab’ewu*, nènku aci’s ki cisòmbedi, nzùbu wa bulààlu, kàdi byònsò pàmwè; ne cikukù lwà paanyimà *apu*. Pangààkabwelamù. . . Ùvwa mwaba mukesè mufiita lupèmba lutòòke, kàdi mulenga, musukula ku nseke yònsò, ne mabaya malamika ku cimanu. Nànkù dìbà adi. . .To, ngèèla meeji ne ùvwa ne dibèji difiita kabùdìmbù ku lusongo lwà musàkà aku, Ndi mvùluka ne ngàakamòna ntutu minène, bu mùdì lumuma amu, milembèlèle pamatù pèndè apu.

¹⁶⁴ Pashìshe pangààkabwelamu, kuvwa cimanyinu cilembejea mwaba awu lwà mu ciibi aci amu, cyàmba ne: “Nzambì Àbèneshe Nzùbu Wetù.” Ànu lwà mu ditumba emu mùvwa bulààlù bwà kale lwà apa, ne bukwàbò lwà apa nùnkù. Ki mwabilaayi munène wa katumbi awu mudyadije panshi (panshi kapàyìku tàpi nànsha), nsongààlùme munène wa katumbi, mulumyànà munène mulenga kumòna mwimane mwaba awu. Ngèèla meeji ne yèyè ùvwa. . .ne bujitu bwà kilò makumi mwandamutekète ne mwandamutekète anyi makumi mwandamukùlù ne umwe, wìpacila ku mètre umwe ne bitùpà mwandamukùlù. Nènku ùvwa ne mbulankètè mu cyanza, wenza ne: “Uhm. Uhm.”

¹⁶⁵ Ki yèyè ne: “Mwànà wa Maman.”

¹⁶⁶ Ki mémè kudyàmbidila ne: “Mwànà wa Maman.” Kàdi nànsha nànkù yèyè ùvwa ne—yèyè ùvwa ne disaamà dyà bwendèndè, kàsènde. Nènku yèyè—yèyè ùvwa ùpùnga ne lufù.

¹⁶⁷ Ki kumutwaye mishìku mu mpàla, kumutuuta cyanza mùshindù awu, wàmba ne: “Mwànà wa Maman.”

¹⁶⁸ Mòna’s, mwoyi kàdi kunsàama bibì be. Mémè kudyàmbidila ne: “Eyowà, nànsha wèwè mutùkine mu mpèkaatù bishi, wèwè udi ànu mwanèndè.” Ki mémè kudyàmbidila ne: “Wamònu’s, nànsha yèyè mubì wa bishi, ùcidi ànu ‘Mwànà wa maman.’” Ki mémè kudyàmbidila ne: “Nzambì wàkamba ne: ‘Maamù ùdi mwà kupwa mwoyi mwanèndè wa ku dibèèle; kàdi Mémè ncyèna

mwà kukupwà mwoyi to, bwalu mènà ènù mmáfùnda mondwela munda mwà cyanza Cyànyì.” Nwamònu anyi? Mmunyì mùdìbì mwà kwenzeka’s!

169 Mémè kutàngila munsantu mukulumpè mukwàte ne byà luse awu ùtwa eku ùtwa eku. Nudi bafwànyìne kwamba ne, mwanèètù, kàvwa ne cintu nànsha cìmwè mu nzùbu amu to; kàdi ùvwa ne cintu kampànda mu nzùbu amu cìvwà cikèngela bwà nzùbu yònsò mu Indiana emu anyi mwaba mukwàbò kanà wònsò kwikala naaci munda mwèndè; aci’s n’Nzambì. Mvw’a kuswa kwikala ne aci kutàmbidila kwikala ne nzùbu munène mulenga mwikale ne bikàndàkàndà byà nsongàakàjì bilamika, ne bintakanyì byà busenji, ne bukooyà. Bible wa kale mwadija mwaba awu Mukàngula, ne mabèjì à kale awu mabunyaMù.

170 Mémè kumutàngila. Ki yèyè ne: “Mpaasàtà mmulwè kukusambidila, munanga wanyì.”

171 Kutùngunukayè ne kwenza ne: “Uhm. Uhm. Mídimà. Uhm.”

172 Ki mémè kwamba ne: “Cìdìye wàmba ncinyì?”

Maamù kwamba ne: “Kí mmumanyè to. Ngàngàbuka mmwàmbe ne: ‘Kènà ne lungenyì mu lwòlù to.’” Kwambayè ne: “Údi wela meeji ne ùdi ùsanganyiibwa mu mbù munène mwaba kampànda, ne ùdi munkaci mwà kwita bwàtu, kàdi mmujìmine.” Ki yèyè ne: “Ki cìndì mémè ncìyì mwà kutwàla nànsha, Mpaasàtà: bwà kumanya ne mwanàanyì ùdi ùpunga ne lufù, mujìmine.” Ke kwambayè ne: “Ndi mmumanyè ne udi mulwè kungambulwisha, bwalu Mukalenge ùkaavwa mungambile bulelèlèlè nànkù.”

Mémè ne: “Nèmmusambidilè,” ki mémè ne, “pàmwàpa Mukalenge neàmwondòpè.”

173 Bwà londapù kí mbuvwa bumutònda to, ùvwa ànu muswè bwà yèyè kubiika ne kwamba ne ùvwa ‘musùngìdìibwe.’ Kwajiki, pàdìbì ànu ne yèyè mmusùngìdìibwe. Nànsha bìshi, s’neàye ànu kuya, musangu kampànda; nànkù, pàdìbì ànu yèyè mmusùngìdìibwe! Kaa, bu twètù ànu mwà kupeta lwìdì alu’s! Cisòmbedi cyà Cyendèlèlèlè cyà dyàmwàmwa dyàdya, ùvwa mmumanyè ne yèyè neàsòmbe nendè cyàkàbìdì pashìishe.

Yèyè ne: “Bu mémè ànu mwà kumuuvwa wàmba ne ùvwa ‘musùngìdìibwe.’”

Mémè kwamba ne: “Twìnyikààku mitù.” Ki kutwàye binù. Nènku mémè kukwàta ànu ku makàsà èndè, kàdi makàsà èndè àvwa bulelèlèlèlè matalàle ne byanza bu bìvwà bilamatapù. Nènku ncìvwa mwà kumubwikidìja cibwikilu to, kaambulankète kakesè—kakesè kapeepèle kàvwàye mumubwikile; nènku kamushìikidìle ànu mu cyàdi, nudi bamanyè’s.

174 Nànkù ki yèyè...Kàdi ùvwa ùkàpulumuna ùkùmuusha mùshindù awu, ànu wèla meeji ne ùvwamù. Kukàpyayè, kàdi mwikala wèla meeji ne ùvwa munkaci mwà kwita bwàtu.

Kutùngunukayè ne kwamba ne: “Kùdi mîdimà yà dikèma. Uhm. Uhm. Kùdi mîdimà yà dikèma.” Ki dîbà adi kuteetayè bwà kuyiikila nendè; kàdi yêyè mutùngùnuke ànu ne kwamba ne: “Kùdi mîdimà ne mashîka,” mumòngane ànu ne kukoka.

¹⁷⁵ Pashîishe mêmè—mêmè kumutàngila kakesè ndambù, ne kutwàye binù mwaba awu, ki mêmè kwamba ne: “Mwabânà, udikù mwà kutùlombola mu disambila anyi?”

Yêyè ne: “Èyowà’s, mukalenge.”

¹⁷⁶ Ànu yêyè, ne mêmè, ne nsongààlùme, ne Nyumà Mwîmpè mu cibambalu amu, kwàjikì. Munsantu wa kale awu kàdi kusambila. Ekèlekèle! Pààkakulàye Nendè, ùvwa umanya ànu ne ùtu wàkula Nendè pa ciibidilu. Èyowà’s, mukalenge! Ùvwa mumanyè uvwayè wàkula nendè. Yêyè ne: “Mukalenge, ncyèna mumanyè ne ciWenza ncinyi to,” mwàkambayè, “kàdi bintu byònsò bìdi ànu mùshindù Ùdi mubyàmbe.”

¹⁷⁷ Kaa, ekèlekèle! Kaa! Ndi ne disànkà dyàbùngì, ndi ne disànkà dyàbùngì dyà ne Yêyè ùcidi ànu Yèsù umwèumwè uvwa kale wàwa ne bansantu abu awu. Yêyè ùcidi ànu Yèsù umwèumwè awu leelù ewu.

¹⁷⁸ Kàdi ncyàkamwasaku bwalu pa bìdi bitàngila ntèndeleeleu wendè to, ní ùvwa Baptiste, mwena Mpenta, anyi ní ncinyi to. Aci kacìvwa bwalu bwànyì mêmè to. Mvwa—mvwa ngènda ndonda ànu Nyumà Mwîmpè cyanààna, ne yêyè ùvwa wènta cintu cìmwècìmwè aci. Tuvwa baswè kumòna civwàYe mwà kwenza aci.

¹⁷⁹ Ki twètù kutwà binù paanshì, ne kubangayè kusambila. Pààkajikijàye kusambila, kujuukaye ne kumutwàye mishìku ku mutu, kwamba ne: “Nzambì, bèneshaku mwanàanyì.”

¹⁸⁰ Ki pashîishe kwambayè ne: “Mpindyewu, udiku mwà kusambila anyi, Mpaasàtà?”

¹⁸¹ Ki mêmè ne: “Èyowà’s, màndamù.” Nènku pa dîbà adi mene tukaavwa twipacila ku dîbà mwandamukùlù ne citùpà, pàmwàpa kushààle tusunsa dikumi ne tutaanu bwà dîbà citèemà, kàdi mvwa nsanganyibwa mu. . . mu kilòmèetà yisàtù ne citùpà kule ne mwaba, pèndè—pèndè ndèkè uumuka pa dîbà mwandamutekète jaajaaja; kàdi nciyi mene mumanye ndìbà kaayi ndingààpatuka nànsha.

¹⁸² Ki mêmè kumwambika byanza byànyì pa makàsà èndè apu, kwamba ne: “Taatù wa mu Dyulu, ncyèna ngumvwa eci to. Kàdi Wèwè. . . Mvwa—mvwa ne cyà kupeta ndèkè kukaadi katancì, twipacila ku dîbà dijimà ne citùpà. Wèwè kutùngunuka ànu ne kwamba ne: ‘Asà lwendu,’ nènku ki bwalu bùmwpelè bündi musangane ebu. Kàdi maamù ewu mmwàmbe ne Wèwè. . . yêyè ùvwa mummòne ndwa. Pìikalàbi ne—pìikalàbi ne ùvwa Ngwèwè, Mukalenge, dîbà adi ncyèna mumanyè cyà dyanza pakuumusha kutentekela mwànà wa balùme ewu byanza.”

183 Nsongààlùme kwamba ne: “Kaa, maman,” mwàkambàye, “bukênkè bwábangì kubwela mwab’ewu mpindyewu.” Nènku mu tusunsa tutwè ku tùtaanu kubangila ànu piine apu, ùkaavwa musòmbe ku mwelelu wà bulààlù, mwele mamwëndè mabòko ku nshìngù.

184 Mémè kudifinda kupàtuka, kupweka ne lubilu ne kwangata màshinyì, ne kunyeema mutàngile ku cilaala-benyi bwà kwangata mushèete wànyì wà bilàmbà. Nènku kudyàmbidila ne mvwa mwà kuyakù ne kwanji kwindilaku, pàmwàpa mvwa ne cyà kwindila ditùkù dijimà anyì àbìdì mu miinè matùkù awu. S’nudi bamanyè ànu mwàkadibi bikolè paanyimà pàa mvità kuntwaku bwà kupeta ndèkè, ki mémè kudyàmbidila ne: “Nebikèngele ngiindileku ndambù wa matùkù.”

185 Ki mémè kuditwa mu màshinyì ne kukùtula lubilu mutàngile kuntwaku, ku cipalu cyà ndèkè. Ndi mwenze ànu mfikakù, kwambabo ne: “Ndèkè wa nombà 196 uyààya ku Louisville, Kentucky, ùdì ùjuuka mpindyewu.” Nzambi kushààla mulamine ndèkè awu panshì bwànyì, mùshindù awu. Kaa, ndi ngiitabuujà nànkù’s!

186 Bu bidimu bibìdì kubangila piinè apu, mvwa ngenda mpweka ne kaulù, mutàngila lwà ku Arizona kwàka, kwà Mwanèètù Sharrit, kuntwaku ku masangisha kampànda. Nènku ki mémè kwangatangana ne Mwanèètù Moore ne bakwàbò. Nènku ki pangàakayà kuntwaku, mémè kwimana kuntwaku ku Memphis. Ki kaulù kudìkòkelaku muntwamu, ne nudikù bamanyè mùshindù ùdiku kàdikokela muntwamu pàyaayàku ku wesètè mùshindù awu, ne pashiishe kààlukila cyànyimà ne kàshintulula makinku ne kiimanyina mu njanja mikwàbò.

187 Nènku màmpà meela minyiinyi awu mu kaulù, bàdi bàèla musinga wà mèyà makumi àsambòmbò pa òmwè. Pàànyì ndi mwà kuàsumba ku mèyà dikumi, dikumi ne àataanu, nudi bamanyè’s, mu myaba mikwàbò. Ki mémè kwindila too ne pàakiimana kaulù, bwà nkadipetèlèku àmwè màmpà meela minyiinyi. Mvwa ne cyà kuya kadisumbila dyà-. . . kafuku ntèntè kàà màmpà mapàya minyiinyi, kàdi bushùwà kutwa naawù cyanga cyà dikèma. Ki mémè kutùpika pambèlù ne kwasa lubilu lwà dikèma ngènda nkòsolola kuntwaku, bwà kusumba dyàmpà dipàya minyiinyi; ngènda nkènzakana, kàvwa ne cyà kushààla mwaba awu mu tusunsa tutwè bu ku makumi àsàtù.

188 Nànkù ki mémè—mémè kubanga kusumbà ndambù wa màmpà mapàya minyiinyi, ki mémè kumvwa muntu kampànda wàmba ne: “Wetwàwu, mwaba awu, Mpaasàtà!” Ki mémè kukènzakana, muntu ewu mulwàte kafulu kakünze, mwimane mwaba awu ùtuuta mipòdi, nudi bamanyè’s, wàmba ne: “Kwèna mummanyè’s, kí mmwòmò to?”

“Ncyèna ngèèla meeji ne ndi mukumanyè nànsha, mwanàànyì wa balùme.”

Kulwaye mwaba awu, wàmba ne: “Ntàngilèku bîmpè!”

Ki mêmè ne: “Èyowà?” Mêmè ne: “Ncyèna ngèèla meeji ne ndi mukumanyè to.”

Yèyè ne: “Ndi mukumanyè!” Yèyè ne: “Wèwè Mpaasàtà Branham!”

Ki mêmè ne: “Èyowà, ncyà bushùwà.” Mêmè ne: “Ukààdiku kacya mubwele mu òimwè dyà ku masangisha àànyì anyi?”

Yèyè ne: “To, mukalenge!” Yèyè ne: “Udi muvùlùke mu dindà kampànda adi diwàkapweka mutàngile ku nzùbu ne maman wanyì ùvwa mwi- . . .?”

“Kaa!” Mungààkamba, “Wèwè kwèna yèyè awu to!”

Yèyè ne: “Èyowà’s, m’mêmè awu! Èyowà’s, m’mêmè awu!” Yèyè ne: “Mpaasàtà,” mwàkambàye, “Ndi mwondòpìibwe, bîmpè menemene, ne byakàne. Nèku kí ng’anu aci to, kàdi mêmè ndi mwena Kilistò patùdi twakulangana apa!”

189 Mukalenge àtumbè! Kaa!

Bàvwa badisangìshe mu cibambalu cyà kuulu,
Bwònsò bàsambila mu Dìna Dyèndè,
Bàakabàtìiibwa ne Nyumà Mwîmpè,
Ne bukolè bwà mudimu kulwabù;
Mpindyewu cyàkabènzelaYè ditùku adi aci
Yèyè neàkwenzèlè byà mwomùmwe,
(Kanwènaayikù ne disànkà anyi?)
Ndi ne disànkà dyàbùngì mùndì mwà kwamba
ne ndi umwe wabò.

Umwe wabò, umwe wabò,
Ndi ne disànkà dyàbùngì mùndì mwà kwamba
ne ndi umwe wabò, Àlèluuyàh!
Umwe wabò, ndi umwe wabò,
Ndi ne disànkà dyàbùngì mùndì mwà kwamba
ne ndi umwe wabò.

Kabèèna ne tùlaasà tunène tulonga ne bikwàbò nànsha:

Nàнку bantu abu bàdi mwà kwikala kabàyi
balonge to,
Anyi bàditàmbisha bwà luumù lwà pa buloba,
Mbapetè bwònsò Mpenta wabò,
Babàtìiibwe mu Dìna dyà Yesù;
Ne bàlondelangana mpindyewu, ne kule ne ku
nseke,
Bukolè Bwèndè bùcìdi ànu bùmwebùmwe abu,
Ndi ne disànkà dyàbùngì mùndì mwà kwamba
ne ndi umwe wabò.

Umwe wabò, ndi umwe wabò,
Ndi ne disànkà dyàbùngì mùndì mwà kwamba
ne ndi umwe wabò, Àlèluuyàh!

Umwe wabò, umwe wabò,
Ndi ne disànkà dyàbùngì mûndì mwà kwamba
ne ndi umwe wabò.

Lwâku, mwanèètù wanyi, ùkèbè dibènesha edi
Dyàkakezulè mwoyi wèbè ku mpèkaatù,
Necìdidishè ngonga yà disànkà
Ne kulamina musùùkà wèbè ùlâkuka ne kapyà;
Kaa, cìdi cilâkuka kapyà mpindyewu munda
mwà mwoyi wànyi,
Kaa, butùmbì kùdì Dîná Dyèndè,
Ndi ne disànkà dyàbùngì dyà ne ndi . . .

Mpindyewu labùlàngànaayi ku byanza ne muntu kampànda
udi kumpàla kwèbè, paanyimà, ne eku ne eku:

Kaa, umwe wabò, umwe wabò,
Ndi ne disànkà dyàbùngì mûndì mwà kwamba
ne ndi umwe wabò, Àlèluuyàh!
Umwe wabò, umwe wabò,
Ndi ne disànkà dyàbùngì mûndì mwà kwamba
ne ndi umwe wabò.

Umwe wabò, umwe wabò,
Ndi ne disànkà dyàbùngì . . . ? . . .
. . . umwe wabò,
Ndi ne disànkà dyàbùngì mûndì mwà kwamba
ne ndi umwe wabò.

Ndi umwe wabò, umwe wabò,
Ndi ne disànkà dyàbùngì mûndì mwà kwamba
ne ndi umwe wabò, Àlèluuyàh!
Umwe wabò, umwe wabò,
Ndi ne disànkà dyàbùngì mûndì mwà kwamba
ne ndi umwe wabò.

¹⁹⁰ Ntèndeleeleu wa kale ewu ncinyi? Wàkabangidila *mwab'ewu*,
ne kuyaaye wenda ùzònta njila mujimà ne Mashi à Yesù Kilistò.
Kaa, ekèlekèlè! Kaa, mùshindù mwine wùndì ne disànkà dyà
Èvànjeeliyò's wè! Kaa! Kaa, èyowà's, mukalenge!

Ùdi ùzònta mashi, èyowà, ùdi ùzònta mashi,
Èvànjeeliyò wa Nyumà Mwîmpè ewu ùdi
ùzònta mashi,
Mashi à bayiidi (bafwìle diitaba, njila mujimà
awu), bàakafwilà Bulelèla abu,
Èvànjeeliyò wa Nyumà Mwîmpè ewu ùdi
ùzònta mashi.

Mpindyewu, Ng'Èvànjeeliyò wa mùshindù kaayi awu? Ànu
mwàkabangàye ku Mpenta amu, nwamònu's.

Wa kumpàla bwà kufwà bwà ndongamu wa
Nyumà Mwîmpè ewu,

Ùwwa n'Yone Mubàtiji (Nwamònu's,
wàkapeta, mu difù dya mamwèndè, nudi
bamanyè's.) . . wàkafwà bu muntu;
Pashiishe kulwakù Mukalenge Yesù,
kuMupoopelabò pa nkùrusè,
Wàkayiisha ne Nyumà ùwwa mwà kusùngila
bantu ku mpèkaatù.

Mutùngùnùke ne dizònta mashi, èyowà,
ùzònta mashi,
Èvànjeeliyò wa Nyumà Mwímpè ewu ùdi
ùzònta mashi,
Mashi à bayiidi bààkafwìla Bulelèlà abu,
Èvànjeeliyò wa Nyumà Mwímpè ewu ùdi
ùzònta mashi.

Kwèna mwà kuMuvwija bulongolodi to! Huh-uh!

Kùwwa Peetèlò ne Pòlò, ne Yone wa Nzambì,
Bààkafila myoyi yàbò bwà Èvànjeeliyò ewu
wàmòna mwà kukenkesha;
Bààkasambakaja mashi àbò, pàmwè ne
bapròfetà bàà kale,
Bwà Dìyi dilelèlà dya Nzambì ndyamòna mwà
kwambiibwa ne meeji matòòke.

Ùtùngunuka ne kuzònta mashi, èyowà, ùzònta
mashi,
Èvànjeeliyò wa Nyumà Mwímpè ewu ùdi
ùzònta mashi,
Mashi à bayiidi bààkafwìla Bulelèlà abu,
Èvànjeeliyò wa Nyumà Mwímpè ewu
wàkatùngunuka ne kuzònta mashi.

Kùwwa misùùkà mwinshi mwà cyoshelu, yidila
mwadi ne: "Too ne dìbà kaayi?"

Bwà Mukalenge kunyookaYe aba bàdì benze
bibì;

Kàdi nekwìkalè bakwàbò kàbidì bààfilà mashi
à myoyi yàbò

Bwà Èvànjeeliyò wa Nyumà Mwímpè ne
nkwaka wendè mukùnze awu.

Ùdi ùtùngunuka ne dizònta mashi, èyowà, ùdi
ùzònta mashi,
Èvànjeeliyò wa Nyumà Mwímpè ewu ùdi
ùzònta mashi,
Mashi à bayiidi bààkafwìla Bulelèlà abu,
Èvànjeeliyò wa Nyumà Mwímpè ewu ùdi
ùzònta mashi.

¹⁹¹ Mpindyewu, kubangila ànu ku cikondo cyà Mpenta, ne bafwile diitaba bàà ku Mpenta abu, kupweka mu èkèleeziyà wa Efèsò, kupweka mu Peegàmò, kupweka mu Twatìlà, too ne

mu—ku Sààdi, mu wa Efèsò . . . anyi wa Filadèláfíyà, ànu nàнку too ne mu wa Laodikíyà. Nènku mpindyewu citùdi . . . cyenzèke kuntwaku ncinyi? Bu mùdi Bible mwâmbè, byònsò bibwela, ne nyama wa Iwonji ewu ùvwa mwà kujuuka mu États-Unis.

¹⁹² Nudi bavùlùke cikèèná-kumòna cyàkabadiibwà kaaba aka, mu cidimu cyà 1933 anyi? Mwà ne cyà . . . Èkèleeziyà kàvwa nànsha mwibaka to. Ncívwa mumanye ne cikèèná-kumòna ncinyi, ncibiikila ne “dibwela dyà mu nyumà.” Mwà ànu muiyishi mutekète wa ba-Baptistes, ne tuvwa . . .

¹⁹³ Matùkù àànyì wònsò à mwoyi mwà mmòna bikèèná-kumòna abi, kàdi nenkonkeku ní nganyi ní nganyi bwà kujuuka ne kwamba ní kùtùkù nànsha címwè cyà ku byòbi cipangile. To, kacitùkù cyanji kwela dikùpà to! Kabyènakù mwà kwenzeka to! Nwamònu anyi? Kabyàdyàkwelakù dikùpà to!

¹⁹⁴ Nènku mpindyewu, ànu dyà mbangisha kàlaasà kàa Dyàlumingu anyi mèmè kubwela mu nyumà. Tuvwa tukènzela lwà mwab'ewu ku nzùbu wa kale wa Masonic, kwà Charlie Kern, twètù kamòtò kakese. Ki mèmè kumòna Mfùmù wa ditùnga Roosevelt ùkafikisha buloba bujimà ku mvità yà buloba bujimà. Kudyanjila kwamba! Mèmè kwamba ne: “Ne kùdi tusùmbù túsàtù: Nazi, ne Fascisme, ne Communisme.” Mèmè kwamba . . . (Mbanganyi bàdi bavùluka mwab'ewu?) Mèmè kwamba ne: “Shààlaayi bajooje Communisme, byònsò nebikakùngwìilemu.” Mèmè kwamba ne: “Éthiopie, Mussolini neàye ku Éthiopie, kàdi neàpangilè.” Ki mèmè kwamba ne: “Ndekeelu wa byònsò netùye mu mvità ne Allemagne, kàdi” Mèmè ne: “Allemagne neikale mu lumbu, mu lumbu lunène menemene lwenza ne mushiki wa nshàmendà.” Bidimu dikumi ne címwè bangabanga ne Maginot Line kwibakiibwa, bidimu dikumi ne címwè.

¹⁹⁵ Mèmè kwamba ne: “Pashìshe paanyimà pàà mvità . . . Netùyicimùnè ndekeelu wa byònsò. Nènku paanyimà pàà mvità mimanè kujika, nebyenzeke ne maalu à mamanya neikale mwà kwenza bintu binène.” Ki mèmè ne: “Pènzàbo nàнку, nebènzè màshinyi à kadyèndelandela, ne tudyèndelandela netùshintulule mbungakeenu ku musangu ne ku musangu.” (S'nudi bamanyè mmwènekèlu uvwawù naawu mu cidimu cyà 1933.) Mpindyewu pashìshe, kwamba ne: “Neikale bu mayi, mafwànàngàne ne mayi. Bwalu ngàakamòna mu cibeeba, cibeeba cinène cyà njààjàmà, kàshinyi kènda kapweka ne njila kàvwa kakàyi ne yènda munda mwàkù nànsha. Kàvwa kankòntonona kùdi bukòlè kampànda.” Patùdi twakula apa bàdi naakù.

¹⁹⁶ Mèmè ne: “Mu cikondo aci . . . Mpindyewu bàdi munkaci mwà kwanyishila bakàji bwà kwenza masungulangana; kàdi bakàji, mu disungulangana, nebìikale ndekeelu wa byònsò . . .” Mèmè ne: “Ditùnga eci dítu ditùnga dyà mukàji, dítu dileejìibwe kùdi cimanyinu cyà mukàji. Dítu ànu mukàji too ne mu cipròfetà, myaba yònsò; ne nombà wa dikumi ne isàtù myaba yònsò

mu cipròfetà.” Ki mèmè kwamba ne: “Nditùnga dyà mukàji, muneemu ùdi ne budìikadidi. Kàdi neàdìnyangàkàjè, yéyè mene ke dinyanguka dyà buloba.”

¹⁹⁷ (Nènku, Roy, ndi ne mukàndà wèbè mumfùndila pa bwalu abu, mukàji munène awu uvwa . . . “Dìna bwalu bwònsò bwà bwenzavì . . . Tudi ne . . . Ndi mwà kucikenketa cyònsò mpindyewu bwà: dìna bwalu bwònsò bwà bwenzavì bùkaadiku bwenjìbwe mu États-Unis, cibangù wa nsamba ùdi ànu mukàji.” Ncyà bushùwà menemene. Ki bakàji bàà masandi mbwòbò abu, nudi numòna’s, ne bikwàbò.)

¹⁹⁸ Mpindyewu, nàнку ki mèmè kwamba ne: “Nekwikale mu ciinè cikondo aci, mu cikondo aci nebànyishile bakàji bwà kwenza masungulangana, kàdi nebàsungule muntu mubi.” Bàakacyenza mu masungulangana mashààle aa. Ncyà bushùwà. “Ke cyàbangisha lumbu alu. Mu cikondo aci nebyènzekè ne—ne nekujuuke mukàji munène mu États-Unis, neikale muvwàle bilenga bilaya,” ne mèmè kwela mu tubòko ne: “(pàmwàpa ng’èkèleeziyà wa Kàtòlikè).” Nwamònu anyi? “Wìkala mwà kwangata bukòokeshi mu bukalenge, ùkòokèsha bakwàbò bwònsò mu États-Unis. Neikale mulenga kumòna, kàdi neikale ne mwoyi mubi wà cikisu ne mwèndè mwònsò.”

¹⁹⁹ Mèmè kwamba ne: “Pashìishe ngààkàngila kàbìdi, ke mèmè kumòna États Unis mutaayike mushààle ànu tupese tupese. Kakùvwa kantu nànsha kàmwè kashààlemù to.”

²⁰⁰ Ki mèmè kudyànjila kwamba dìbà adi. “Mpindyewu eci, cìvwa ng’EMU MMÙDÌ MUKALENGE WÀMBA.”

²⁰¹ Kàdi elààyibi meeji tǔng! Àtaanu à ku maalu mwandamutekète madyànjila kwamba awu, àkaadi mamanè kwenzeka.

²⁰² Bwà èkèleeziyà kwangatayè bukòokeshi, èkèleeziyà wa Kàtòlikè. Ne dilwa dyà cikondo cyà nshìikidilu.

²⁰³ Ki mèmè kwamba ne: “Ngààkamòna, byenze bu ne kùvwa bikuuku byà micì byòshika; mbwebwe, mitaayikàngàne; ne États Unis mujimà umweka ànu munda mutupù, mulekela mùshindù awu, kutwàdijila ànu mwaba ùmvwà mwimànyine awu too ne kule kùvwa mèsù àànyì mwà kushìikidila aku.”

²⁰⁴ Ki mèmè kwamba ne: “Ndi ndyànjila kwamba, bilondèshile mùshindù ùdi cikondo cyènda ciya, nebìikale pàmwàpa pankaci pàà cidimu eci cyà 33 ne 77.” Nènku nebikèngele bwà kwenzekabi ne lubilu lukolè menemene bwà kupicilamù.

²⁰⁵ Kàdi’s tudi basòmbèle pa kapànzà kàà lupwishi, balunda bàànyì. Byònsò mbimana kulongolola.

²⁰⁶ Kaa, kàdi Taatù wetù wa mushinga mukolè wa mu Dyulu Wàkalaya awu, Wàkalaya awu’s! Ki mbilenga bilayà bwà kwìkala musadidi wa Kìlistò anyi? Bintu byònsò byàkalayàYe abi’s! Nènku anji elààyibi meeji; tudi ne dyèsè. Yéyè ùdi ne mwoyi

kaaba aka mene. Yéyè neetù mpindyewu mene, mmùmanyè dîná bwalu busokoka bwà mwoyi ne mwoyi wónsò, mmùmanyè maalu èbè wónsò; ndimì yà kapyà ayi yìdì ànu munkacì mwà kulàkuka mu myoyi yètù, mmùmanyè maalu ètù wónsò, mmùtùngè.

207 Nènkù kanwènaayiku ne disànkà bwà kwikala mu kasùmbù kakesè kàà banyààbanyà aku, dilòòlò edi, kàdì kalame Diitabuujà anyi? Bwalu cìvwà ndíyì Dyèndè ditùma ne: “Kanùciinyi to, nwènù kasùmbù kakesè kàà mìkòòkò, ndiswa dîmpè dyà Taatù Wenù bwà kunùpèèsha Bukalenge. Kàdì mudimu ewu wówò kawùyì mwipidija to, muntu nànsha umwe kààkusùngidiibwa nànsha.” Nwamònu’s, tukaàdì ànu ku cikondo cyà nshìikidilu.

208 Beena Mpenta mbashààle bakwàcike mashìka, bàà civùmùvù, batwila mukana mwà Nzambì.

209 Ànu kasùmbù kakesè kàà menemene kakòkela pambèlù apa, ànu ndambù, kàdì mu kòkù amu nemùpàtukile: “Mònaayi, Mubaki nyà ulwa!” Nènkù pàdìbì byènzeka nànkù, cyònsò cyà ku bilù ebi, cilù cyònsò cyà ku bilù ebi, bwà. . . Vùlukàayi ne, kùdì bilù mwandamutekète bijimà. Kàdì twètù tudi ànu mu cilù cyà ndekeelu *eci*. Kàdì yònsò wa ku baavirgò abu kubangila ànu ku ntwàdijilu too ne *leelù* wàkabìika. Amen! Kaa, cìvwà ncinyi? Nyumà Mwìmpè umweumwe awu.

210 Dìbà adi pààbwelà èkèleeziyà. . . Bu mutùvwà bangàte mu dyàlumingu dilòòlò, Yòzefù bwà kudìmanyisha kùdì Izàlèlèlà, bàna bààbò, wàkapàtula mukàjèndè mu nzùbu, ne byònsò, ne kubàtùmayè mu nzùbu wa bukalenge. Ki kwìmanayè nkààyèndè ne beena Yudà, kwambayè ne: “Mèmè ke Yòzefù, mwanèètù awu.”

211 Cìtèèkaayi lwà mu Mifùndu mwaba ùdìbo bambe ne nebàteeke ditùkù dyà madilu, ne nzùbu ne nzùbu yònsò ùdididila pàà nkààyèndè.

212 Bààkamba ne: “Ebi bibangu Udi mubìpetèle penyi?”

Yéyè ne: “Mu byanza byà. . .”

“Mu byanza Byèbè?”

Yéyè ne: “Mu nzùbu wa balunda Bàànyì.”

213 “Aba bààkaMutwà difùmà nebàMutàngile.” Kàdì’s ki Yéyè awu mwimàne, Yòzefù awu.

214 Yéyè ne: “Kanwìkadi. . .” Bu mwàkambà Yòzefù ne: “Kanùdìfikidi munda to, bwalu Nzambì ngwàkenza nànkù bwà kusùngidila mwoyi wènù.” Cinyi? Mwoyi wà Èkèleeziyà, wa bàà Bisàmbà byà bendè ne: “Bwà bwalu bwà Dîná Dyèndè, kupàtula cisàmbà mu bàà Bisàmbà byà bendè.”

215 Kaa, tukaàdì ku nshìikidilu, bàna bèètù. Tudi kaaba aka! Dîná dyà Mukalenge dibènèshìibwè! Twìmbàayi musambu mwìmpè wa kale ewu, bu bàna bàà beena mpenta balùme ne

bakàji, pàmwè. Mpindyewu, wêwè udi wamba ne: “Èè, mèmè ndi Baptiste.” Kàdi wêwè ne Dibènesha dyà Mpenta, udi mwena mpenta. Uh-hum. Èyo. Èyo:

Mwonji ùdi ùswikakaja myoyi yètù
 ùbèneshiibwè
 Myoyi yètù mu dinanga dyà Kilistò;
 Bwobùmwè bwà meeji à buuwetù
 Mbufwànàngane ne bwà ku kuulu.

216 Mpindyewu tèèlèjàayi, nwênù balunda bàànyì. Kwòkò kwikàle muntu kampànda munkaci mwètù emu, mu mùshindù wà ne mwaba kanà wònsò mu lwendu lwà mwoyi elu, udi kaabululu kakesè kalwè munda mwà mwoyi wèbè, (Ntèèlèjàayi's!) cipàtulemù ànu mpindyewu. Cyangataayi, kanulekediku kantu nànsha kàmwè. . .

[Mwanèètù wa bakàji kampànda ùdi wàkula mu mwakulu mukwàbò. Katùpà kàà mukàbà wa mèyi munda mutupù. Mwanèètù wa balùme kampànda ùdi wàndamuna—Muf.] Amen. [Mwanèètù wa balùme kampànda ùdi wàkula mu mwakulu mukwàbò ne pashìshe wàndamuna.] Amen. Amen.

217 Mukalenge Yesù, tudi tuKusàkidila bwà mayiisha aa. Cìdi citùbindulula, Mukalenge mùtùdì bamanyè ne katwèna bacyepùke to kàdi tudi balame diitabuujà. Kaa, ndi ndòmba, Nzambì, bwà Nyumà àtungunukè ne kushààla mu èkèleeziyà. Tulamineku mu bwobùmwè kùdì muntu ne mukwèndè, Taatù. Tulamine pàmwè Neebè. Ne enda munkaci mwètù, Mukalenge, mu eci citèèkedi cyà mwèndù cyà ndekeelu cyà cikondo mutùdì ne mwoyi emu. Ikala Bukènkè bwètù. Kenkèshila pambidi pèètù, mu bikondo binène byà mìdimà ebi, Mukalenge, bwalu tudi tumòna ne *citèèkedi cyà mwèndù* ne *mìtootò* bìdì byàkula bwà “mìdimà.” Nènku Mukalenge, tudi ne disànkà dyà ne tudi bàna bàà Bukènkè, twenda mu Bukènkè bwà Nzambì. Twètù katwèna baswikila pa buloba ne bintu byà pa buloba ebi to, kàdi tudi bàna Bèèbè. Mùshindù mwine utùdì tuKusàkidila bwà maalu aa.

218 Tudi tuKusàkidila bwà ditùmà dyà mayiisha aa bu dishindika dyà Diyì Dyèbè. Swàkù bwà Wèwè kupèèbwa luumù misangu yònsò, Taatù. Swàkù bwà Wèwè kutwèpula ku bululu bwònsò bwà pa buloba. Tulamàku bajidila, bwà ne nsòmbelu yètù kwikalayi mikezùke ne misukula ne yà cijila kumpàla Kwèbè. Enzaku bwà Mashi à Yesù Kilistò àcyènzèleku yònsò wa kutùdì, Mukalenge. Kwòkò kwikala cintu kampànda cìdì kaciyi cijaalame munkaci mwètù emu, cyumùsheku. Cyumùshè kutùdì, Mukalenge. Edi ndìbà dyà bikondo byà didikenketa.

219 Masangisha aa mmenza bwà kiipàcìla aku bwà kukenketa myoyi yètù. Wèwè wàkamba ne ndimì yà kapyà yà mèsù Èbè ayi, “yàkakenketa bwà kumanya makòokeshi à mu mwoyi.” Ncyà bushuwà ne udi wenza nànkù, Taatù. Nènku ùtwakwileku

ne pashiishe ùtwambile bwà kwenza...kushààla twètù biine badìlongölöle bwalu dibà adi dikaadi difika.


220 Kaa, mùshindù mwine wutùdi tuKusàkidila bwà bwalu ebu, Taatù. Netwénzè aci ne byònsò bidì munda mwètù ku ngàsà Webè. Amen.

221 Kaa, kanwènaayikù baMunangè anyi? Mpindyewu, bu ne kùvwa mwà kwikala mwenyi munkacì mwètù, mùshindù awu ngùvwàbi ku cibangidilu. Pàvwà Yesù pànu pa buloba apa, Wàkamba, muntu kampànda kuMukonka bwà bwalu bwà dibàkà ne difwà dyà dibàkà anyi cikampànda, kwambaYè ne: “Kabìvwa nàнку ku cibangidilu to.” Bìkèngela kwalukila ku cibangidilu.

222 Dìbà adi pìikalàbi ne cibangidilu cìvwa èkèleeziyà wa Mpenta ne Yèyè mwikale Mwonji wà mvinyò, twètù biikale matàmbà, musangu wònsò wùdi Mwonji wà mvinyò awu wùpàtula èkèleeziyà, neikalè èkèleeziyà wa cyena Mpenta, ditàmbà dyà cyena Mpenta; cintu cimwècimwè cìvwa ku cibangidilu aci (Nwamònu anyi?), musangu wònsò. Mpindyewu, udi mwà kusomeka makwàbò matàmba mu wòwò awu kàdi neàkwame mamuma àwù. Udi mwà kwangata mu—mucì wà orange ne kusomekamù didimà dyà mpùsù, newùkwame madimà à mpùsù mwikàdile ne mwoyi ku mwoyi wà orange. Somèkamù mbòmà, kàdi neàkwame bimuma byà mbòmà bwalu mbimuma byà madimà.

223 Nàнку malongolodi aa, màngumba ne bikwàbò, mbilamika pambidi apu, bidìbiikila beena Kilistò, bàdi mwà kwikala ne mwoyi ku mwoyi wà Kilistò. Aci's ncyòci menemene, kàdi nebàkwame mamuma à cyena màngumba. Ncyà bushùwà. Bwalu mbalamika kuntwaku ànu nàнку. Kàdi ditàmbà adi dyòdi didìdinge ànu dipàtule...anyì Mwonji wà mvinyò awu wòwò mudìdinge mupàtùle ditàmba, nedìikale...nedifundè Mukàndà wà Byenzedi wènda ùdilonda. Aci's ncyòci ànu menemene. Bwalu aci ke cyàkenzeka musangu wà kumpàla. Dìna ditàmbà dyònsò dyàdipàtwilàdi adi nedìkwamè oranges, ditàmbà ne ditàmbà dyònsò. Nèнку Bible mmwakùle; ùvwa ne matàmbà dikumi ne àbidi.

224 Kaa, ndi ne disànkà dyàbùngì dyà kwikala ne mwoyi mwinshi mwà ditàmbà adi, kàdi nwènu? Èyowà's, mukalenge. Kaa, mbilenga be.

225 Èyo, vùlukàayi ne mààlabà dilòòlò mpindyewu mu cikondo cyà Filà-...cyà Sààdi. Kùdi...?...bàpàtukila mu bulongolodi bwà ba-Luthériens, Martin Luther...?... 

60-1208 Cikondo Cyà Èkèleeziyà Wa Twatilà
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org